



九 5  
卷



遊記第九册上

江陰徐宏祖霞客著

子 寄介立



同邑

季夢良會明編

新陽孔繼泰岳瞻

楊名時凝齋閱

族孫徐 鎮筠峪

重校

滇遊日記十

己五月初一日平明起店主人言自往尖山後參府吳公屢  
令把總來候且命店中一至卽入報余不知其因令姑緩之  
且遊於市而主人不聽已而吳君令把總持名帖來言欲躬  
叩旅肆不便乞卽枉顧爲幸余領之因出觀街子此處五日  
南門外大街來鳳山麓是日因早斷屠祈遂往晤潘捷余捷  
兩移街子於城中早卽移街諸鄰邨皆然

余宴買寶舍人留余同事余辭之入城謁叅府一見輒把臂入林欵禮頗至是日其子將返故鄉內簡拾行囊余辭之出吳四川松潘人為余談大江自彼處分水嶺發源分達省城而復合且言昔為貴州都閫與陳學憲平人土奇同事知黃石齋下午還寓集鷹山寶藏徒徑空來顧抵暮別去

初二日余止寓中雲峰山即尖山老師法界來顧州庠彦李虎

變昆玉來顧李居綺羅

初三日參府來候宴已又觀音寺天衣師令其徒來候余以叅府有前期辭之上午赴叅府招所陳多臘味以斷屠故也

臘中味始食竹脆下午別之出醉後過萬壽寺拜法界不在出西門

半里過凌雲橋又西半里由玉泉池南堰上西山之麓則觀

音寺在焉寺東向臨玉泉池寺南有古刹並列即玉泉寺矣天衣師拜經觀音寺三年不出一見喜甚留余宿余辭以他日啜其豆漿粥而返已昏黑矣

初四日參府令門役以州志至方展卷而李君來候時微雨遂與之聯騎由來鳳山東麓循之南六里抵綺羅入叩李君家綺羅志作矣羅其邨頗盛西倚來鳳山南瞰水尾山當兩山夾湊間蓋羅漢冲之水流經大洞長洞二小阜間北曲而注於平塢乃分為二流北為飲馬河而抵城東南為綺羅水而逼南山下又西逼來鳳東南麓乃南搗兩山夾間是邨縮其谷口竹樹扶疎田壑紆錯亦一幽境云是夜宿李君家

余初望騰越中塢東為球琤矣比西為寶峰毘盧南為來鳳羅生北為千我飛鳳西北則龍從最聳而龍潭清海之水溢焉東南則羅漢冲最深而羅生黃坡之流發焉東北則赤土山最遠而羅武馬邑之源始焉大盈江惟西南破龍光臺來鳳西麓而去則是州之脉蓋西北由集鷹山分脈南下者為寶峰毘盧而盡於龍光臺東曲者一峙為筆峰再聳為龍從遂東下而度千我之嶺又東南而紆為永安亂箭之哨其曲而西也余初疑南自羅生水尾而北轉為來鳳至是始知羅漢冲水又南下於羅苴冲則來鳳之脉不南自羅生水尾而實東自黃坡矣比二坡也但二坡之西皆平塢而南抵羅生

脉從田隘中西度

郡人陳懿典進士文星閣記云嘉靖壬子城外遇鑿城隍至正南迤東竊地丈許有

絡石工役斲截之其石纍纍如脊骨穿地而來土人不知乃乃秀峰之元龍正脉也其說可與余相印証

分濬羅漢冲水一枝北流為飲馬河而抵於城東是此脉一傷於分流再鑿於疏隍兩受其病矣土人之為之解者曰脉由龍光臺潛度於跌水河之下不知跌水河雖石骨下亘乃大水所趨一壑之流交注焉飲馬河本無一水兩分之理乃人工所為欲以此掩彼不可得也

初五日晨餐後即從李君循南山之麓東向行先半里過水應寺又東二里兩逾南山北下之支有寺在南峽中北向峙即天應寺也其後即羅生主峰仰之甚峻志稱其條岡分布

不誣也又東半里上一北下之支隨之北下共一里岡東盡處竹樹深密綠蔭襲人披映心目其前復起一圓阜立平疇中是爲團山與此岡斷而復續岡東邨廬連絡余從竹中下一老人迎入其廬具臘肉火酒獻蓋是日端午而老人與李君有故遂入而哺之既午復東向循南山行半里其北復起一長阜如半月橫於前是爲長洞山又東二里遂入山峽有溪中貫而出是爲羅漢冲溪南北皆有邨夾峙峽口由南邨溯溪而東又二里越溪之北有大路倚北山下乃東逾嶺趨猛連者從其北塢中覓溫泉其泉不熱而溫流不急而平一大石突畦間水滙其旁淺不成浴東山下有大洞溫泉爲八

景之一卽在其北嶺峽中與此隔一支嶺逾而北頗近而李君急於還家卽導余從大路西出二里過溪南邨出峽口隨溪西行一里過一橋從麓南又西一里過長洞北麓北望大洞之阜夾溪而峙余欲趨之浴其溫泉李君謂泉在東峽中其入尚遠遂強余還又西一里過團山北麓又西三里而還李君家

初六日晨飯令顧僕携卧具爲楊廣哨之遊先是李君爲余言此地東南由羅漢冲入二里有滃呂山東南由羅生四十里有馬鹿塘皆有峰巒可觀余乃先其近者計可從硫黃塘半箇山而轉也東三里從水應天應二寺之間南向上山

愈上愈峻七里登絕頂北瞰卽天應寺懸其坑麓山州塢而北惟巖從山與之對峙焉西瞰則旁峽分趨勢若贅旒皆下墜於綺羅南向之峽有龍井由其下焉惟東眺則本峰頡頏自掩而南眺則濃霧瀟淪若以山脊爲界咫尺不可見於是南從嶺上盤峽俱行氤氳中茫若蹈海半里南下下二里餘山半復環一壑其脊自東南圍抱而西中藏圓塢有小水西去其內霧影稍開而雨色漸逼雖近睹其田塍而不免遠罹其沾溼矣復上南坡躡坡脊而南五里一岐隨脊而西南一岐墜坡而東向余漫從脊上直南已而路漸東下而窮二里有邨倚東坡下披霧就訊之乃清水屯也按志城南三十里

爲清水則此其地矣然馬鹿塘之徑當從北岐分向而東此已逾而過南屯人指余從坡北東下當得大路從之半里東北涉一坑甚深霧影中窺其東南旋壑下盤當時不知其所出何向後乃知其南界高峰反西自竹家屯而東突爲陳播箕哨也復東北上坡半里見有路東向下輒隨之行不意馬鹿塘正道尙在其北霧漫不辨踉蹌東下一里餘有峽自北而南溪流貫之有田塍嵌其底而絕無人居塍中插禾已遍亦無一人抵塍而路絕塍狹如線以杖挂畦中東行抵溪而溪兩岸蒙翳不可渡復還依西坡南向一里得小徑渡溪東上一里路伏草間復若斷若續然其上甚峻三里東向登嶺

頭復從嶺上東南再陟一嶺半里始見嶺北有峒自北南度中伏再起其東則崩崖下墜其勢甚拓其墜甚峭若中剖其脊并左右兩嶂而平墜焉峒北有路自崩崖北嶺東行南亦有微路自崩崖南嶺東上而峒中獨無北交之路余遂循崖南路上東一里路爲崩崖所墜復岐而南再陟南嶺半里復東行嶺脊二里始有南來之路循之東北瞰崩崖下陷東向成坑箐木深翳又東半里再陟嶺嶺乃南去微徑始東北下坡曲折連下三里余以爲將及北坑之底隨之出卽馬鹿塘矣孰知一坡中環路岐而東西繞之未幾遂絕皆深茅叢棘坑嵌其下甚深余始從其南不得道轉而東復不得道往返

躑躅茅深棘翳遍索不前久之復從南坡下得微徑下一里餘而東抵坑底則坑中有水潺潺自崩崖東南流坑兩旁俱峭崖密翳全無路影而坑底甚平水流亂礫間時有平沙灤之遂隨之行或東或南仰眺甚逼而終絕路影三里稍開俯見灤沙之上虎跡甚明纍纍如初印隨之又東南一里餘有小溪自西南來注有路影南緣之始舍坑而南陟坡一里越其上余意將逾坡東下而路反從坡脊南行余心知其悞然其路漸大時亦漸暮以爲從大道卽不得馬鹿塘庶可得棲宿之所乃躡脊西馳二里見西峰頂有峰特倚如覆鐘大道從此分岐一自東南坡下而上一向西北峰頂而趨一從西

南盤壑而行未審所從姑解所攜飯啖之余計上下二徑其  
去人必遠不若從盤壑者中行於是又東南三里遂墜坡而  
下漸聞人聲下里餘得茅二龕在峽間投之隘鄙不堪宿望  
南坡上有數龕乃下陟深坑攀峻而上共一里而入其龕則  
架竹爲巢下畜牛豕而上托爨卧儼然與粵西無異屈指自  
南丹去此至今已閱十五日乃復遇之西陲其中數千里所  
不見也自登崩崖之脊卽望見高黎貢南亘之支屏列於東  
下有深峽而莫見龍川意嵌其下也又西南二十餘里至所  
宿之坡下瞰南峽甚深卽與高黎貢遙夾者意龍江從此去  
西塢甚豁遠見重山外亘巨壑中盤意卽南甸所托也時霧

黑莫辨方隅而邨人不通漢語不能分晰微奧卽徵其地名  
據云爲鳳田總府莊南至羅卜思莊一日餘東北至馬鹿塘  
在二十里外然無確據也夜以所攜米煮粥啜之而卧

初七日陰雨飯後余姑止不行已而邨人言天且大霽余乃  
謀所行念馬鹿塘在東北硫磺塘在西北北山之脊昨已逾  
而來西山之脊尙未之陟不若舍馬鹿而逾西脊以趨硫磺  
塘且其地抵州之徑以硫磺塘爲正道遂從之土人指余從  
邨後西北向大山行余悞由直北一里餘下涉一澗溯之北  
上破一里餘又下涉澗其處一澗自西峽崩崖來一澗自北  
峽崇山來涉其西來者又北上坡半里路復分岐一向北峽



一向西峽皆盤其上坡余從其北峽者二里路漸湮已北下則其澗亦自西來橫塹於前雖小而頗深藤箐蒙塞雨霧淋漓遂不能入乃復出至岐口轉向西峽一里路亦漸湮其南崩崖下嵌卽下流之所從出而莫能逾焉復出從岐口南涉其澗從澗南又得一岐西上其路甚微一里北逾一坡又北一里卽崩崖西對之坡也其上皆墾崖而仍非通道躡之行一里上西頂頂高雲黑莫知所從計返下山乃轉南行莽棘中溼茅壅箐躑躅東南向二里漸有徑下眺鳳田所宿處相距止二三里間更南半里得大道西去遂從之西循北山行一里得耕者在坡下問之始知其上有小寨名擺圖卽從楊

廣哨入州正道矣乃亟西北上躡坡一里有二茅當峽坪間是爲擺圖寨由寨後更躡峻而北半里登岡西望盤壑下開水田漠漠有溪流貫其中壑西復有崇山外峙其南又起一崇山橫接而南交接之中似有水中貫而去又北上一里半遂凌大脊北下迴峽中半里一邨廬倚南坡是爲楊廣哨從此西北下峽底一里餘有小溪自東北墜西南其嵌甚深乃從昨所度崩崖南嶺分墜而成者涉之西北上復一里餘而躡其脊余以爲卽從此緣脊上北大峰矣而孰意猶中界之支也半里越脊又卽北下峽底一里餘有大溪自北南墜皆從石崖中破壁而去此卽清水朗東溪也水嵌峽底甚逼橫

獨木渡其上余寧木下涉水卽西北上坡始循崖石繼躡隴脊一里餘轉而東北上一里躋峯頭由峰頭西盤半里復隨峽北行其峽頗平行其中一里餘當其東西分峽處有邨廬倚其中是爲陳播箕哨從哨北卽西北下二里循南山而西一里有邨廬當坡是爲竹家寨由寨東向北行寨後復起一峰有峽橫其中路分爲二循北峰直去爲騰越南甸大道穿北峰南峽而西爲硫磺塘道余乃舍大道從橫峽西行半里忽墜峽西下其峽甚逼而下甚峻墜級歷坎與水爭隘一里餘望見西峽自北而南一溪貫其中卽夾羅邨之水挾水尾山西峽而南者溪西之山嶽岫南踞是爲半箇山按一統志

有羅苴冲硫磺塘在焉疑卽此山然州志又兩書之豈羅苴冲卽溪東所下之山耶又西下半里直抵溪上有二塘在東崖之下乃溫水之小者其北崖之下有數家居焉是爲硫磺塘邨有橋架溪上余訊大塘之出硫磺處土人指南峽中乃從橋南下流涉溪而西隨西山南行時風雨大至田塍滑隘余躑躅南行半里得徑又南一里則西山南迸有峽東注大溪遙望峽中蒸騰之氣東西數處鬱然勃發如濃煙捲霧東瀕大溪西貫山峽先趨其近溪煙勢獨大者則一池大四五畝中窪如釜水貯於中止及其半其色渾白從下沸騰作滾湧之狀而勢更厲沸泡大如彈丸百枚齊躍而有聲其中

高且尺餘亦異觀也時雨勢亦甚大持傘觀其上不敢以身試也其東大溪從南下環山南而西合於大盈西峽小溪從熱池南東注大溪小溪流水中亦有氣勃勃而池中之水則止而不流與溪無與也溯小溪西上半里坡間煙勢更大見石坡平突東北開一穴如仰口而張其上齶其中下縮如喉水與氣從中噴出如有爐橐鼓風煽焰於下水一沸躍一停伏作呼吸狀躍出之勢風水交迫噴若發機聲如吼虎其高數尺墜澗下流猶熱若探湯或躍時風從中捲水輒旁射攬人於數尺外飛沫猶爍人面也余欲俯窺喉中爲水所射不得近其齶齶之上則硫磺環染之其東數步鑿池引水上覆

一小茅中置桶養硝想有磺之地卽有硝也又北上坡百步坡間煙勢復大環崖之下平沙一圍中有孔數百沸水叢躍亦如數十人鼓煽於下者似有人力引水環沙四圍其水雖小而熱四旁之沙亦熱久立不能停足也其上煙湧處雖多而勢皆不及此三者有人將沙圓堆如覆釜亦引小水四週之雖有小氣而沙不熱以傘柄戳入深一二尺其中沙有磺色而亦無熱氣從戳孔出此皆人之釀磺者時雨勢不止見其上有路直逾西嶺知此爲半箇山道遂凌雨躡崖其崖皆堆雲駢巒崿嵌空或下陷上連或旁通側裂人從其上行熱氣從下出皆迸削之餘骨崩墜之剝膚也所云半箇之稱

豈以此耶躡崖半里從其南循嶺西上一里漸隨峽南轉則其峽自南嶺頭墜中有水懸而爲瀑作兩疊墜北下卽峽水之上流也又上半里遂西逾瀑布之上復從峽西更西南上一里漸轉而西半里見大道盤西崖墜處出南峒去小徑則西上峰頂漸轉北行蓋此卽半箇山之頂至此南下爲峒入城之路當在其東北不應西去遂捨大道從小道西上半里隨峰東向北行二里餘乃西北下得竹塢邨廬時雨勢甚大避雨廬中就火沸湯滌飯而食之其處卽半箇山邨也昔置鎮奠關於路次此爲屯哨今關廢而邨存云由其東下坡隨峽東行里餘與南來大道合隨西山北轉而行於是水尾西

溪卽從此峽南下疏磺塘矣北行二里餘復陟東突之坡行坡峽中五里稍下又一里而綺羅邨在東坡下矣時已薄暮遂捨入州大道東里餘宿李虎變家虎變以騎候於馬鹿道中不遇甫返煮竹颺相待

初八日大雨不成行坐李君家作田署州期政四謠以李君命也

初九日大雨復不成行坐李君家錄騰志

初十日雨不止旣午南霽遂同李君聯騎由邨西半里橫陟半箇山南甸大路經南草場半里西上嶺坡乃來鳳南度半箇山之脊也來鳳至是南降而下伏脊間中窪爲平埕而不

受水窪之西為金銀堆即南度之脊窪北半里有坪倚來鳳而南瞰半箇山乃昔王尙書驥駐營之處志稱為尙書營陟坪北半里有路橫沿來鳳峰南西越金銀堆出芭蕉關芭蕉關西通河上屯緬箐之道州西跌水河路不若此之平昔兵部郎中龔永吉從王公南征有狹轉芭蕉關難於橄欖坡之句從此復轉騎循來鳳東峰而北八里乃還官店迨晚復雨

十一日雨不止坐官店上午李君來下午雨少止濶甚蹶泥往潘生家不遇以書促其為全買物亦不答潘生一桂雖青多緬貨時倪按君命承差來覓碧玉潘苦之故屢屢避客

十二日雨坐店中李生以期政四謠私投署州田二府不答十三日雨時止時作而泥濶尤甚李生來同往蘇元玉寓觀

玉蘇滇省人本青衿棄文就戎為吳參府幕客先是一見顧余余亦目其有異非風塵中人也蘇有碧玉皆為簪但色太沉余擇四枝攜寓中後為

李生強還之

十四至十八日連雨不止坐寓中不能移一步潘捷余以倪院承差蘇姓者索碧玉寶石寤甚屢促不過余寓亦不敢以一物示人蓋恐為承差所持也幸吳參府以程儀惠余更索其入關併三宣六慰諸圖余一一抄錄之數日無暇刻遂不知在寓中并在雨中也潘生送翠生石二塊蘇元玉答華茶竹方環十九日晨雨少止覓擔夫以連日雨濶貴甚既而雨復作上午乃止而行店人欲措余羅一端不遂與之鬩而後行由東

街始湮甚已而漸燥二里居廬始盡下坡行陞中半里連越  
二小橋水皆自東南來卽羅漢冲所出分流之水也又二里  
餘爲雷打田有數家東向從其前轉而東行里餘又過一小  
亭橋其流亦自東南向西北者乃黃坡泉所溢也又東里餘  
抵東坡下停擔於酒家問大洞溫泉道士人指在東南山幽  
中此去尚有數里時天色已霽令擔夫與顧行待於其家余  
卽循東山而南二里過土主廟廟倚山西向前二柏巨甚又  
南二里路岐爲二一南循山麓爲黃坡道一東南上坡爲趨  
溫泉道乃從上坡者南一里登坡嘴西瞰山麓有泉西向溢  
於下卽黃坡之發源處也於是東轉有路頗大橫越之就其

東南小徑一里漸上坡折而東北晚溫泉之峽當在其南中  
亦有峽南下第茅塞無徑遂隨道西北上一里其道漸高心  
知其悞有負芻者二人至問之曰此入山樵道可通芹菜塘  
者溫泉在南尙隔一峰遂與之俱返一里下至茅塞之峽指  
余南去余從之橫蹈峽中旣漸得小徑半里忽有峽從足下  
下墜而西其上石崖駢突如門從其東又南半里逾坡而下  
其峽始大有水淙淙流其中田塍交濼之卽大洞邨之後峽  
也有大道從峽中東上又南下半里從之東半里上一坡大  
道東北上亦芹菜塘道乃從坡東南下半里及溪又東溯溪  
半里則溪流奔沸盤石中右一崖突而臨之崖下則就石爲

池而溫泉匯焉其池與溪同峽而水不關溪流也崖石疊覆如纍碁其下湊環三面成一小孔可容一人坐浴其後倒覆之石兩片下垂而中劃如所謂試劍石水從片中淙淙下注此溫泉之源也池孔之中水俱不甚熱正可着體其上更得一亭覆之遂免風雨之慮矣時池上有十餘人共浴余恐其旁有石洞姑遍覓之不得乃還浴池中又三里壑山之西嘴抵黃坡轉北一里過麓間溢水之上又北三里乃入來時分岐處又西北四里至矣比坡之麓促挑夫行以晚辭遂止二十日晨起飯而登坡雨色復來平上二里峻上八里抵嶺頭又平行嶺上四里又稍下一里過芹菜塘復東上坡半里

而下半里過木廠又下二里過北下之峽又東上三里至坡脊平行脊間一里至永安哨五六家當坡間而已又東南半里逾嶺脊而下一里有水自北而南路從之半里乃東涉坡平行脊上三里至甘露寺飯從寺東下三里至赤土鋪橋其下水自南而北卽大盈江水也一統志謂大盈之源出自赤土其言不謬橋東復上半里有四五家當坡峒爲赤土鋪鋪東又上半里遂從嶺脊東南行一里有岐南去爲猛柳道余仍東南三里乃東下又十里而止於橄欖坡時纔午雨時下時止遂止不前

二十一日平明起飯自橄欖坡東下五里抵龍川江西岸過

巡檢司卽下渡橋西岸峻若堵牆乃循岸北向疊級始達橋  
橋東有閣登之可眺江流天矯之勢又南向隨東岸行半里  
東向平上者一里餘始曲折峻上五里過茶房僧舍無一人  
又峻上三里過竹笆鋪又上七里餘飯於小歇場又上五里  
過太平鋪又平行入塢二里餘有水自北澗來涉之遂東上  
其上愈峻兩旁皆竹石深翳而風雨西來一天俱漫於是行  
雨浪中三里逾一最高之嶺乃屢上屢下屢脊屢岫皆從密  
箐中行七里抵新安哨兩三家夾嶺頭皆以劈藤竹爲業時  
衣溼透寒甚就其家燒薪烘之又二里餘抵分水關有五六  
家當關之東余乃就火炙衣貫燒酒飲四五杯乃行天色大

霽路磴俱燥乃知關名分水實分陰晴也於是東向下者八  
里始就東行之脊又二里過蒲滿哨又平行嶺上東十五里  
宿於磨盤石之盧姓者家有小房五六處頗潔

二十二日平明行其下甚峻曲折下者六里及嶺北之澗是  
嶺自蒲滿哨分支東突左右俱有深峽夾流來時從兩峽上  
行至此墜北峽之口過涉北澗又越北嶺東突之嘴共一里  
餘而過八灣入灣亦有數家居坡上人謂其地暑瘴爲甚無  
敢置足者於是東向行平坡間十二里抵江則怒流奔騰勢  
倍於來時矣乃坐巨樹下待舟觀洪流洶湧競渡者之紛紜  
不啻從壁上觀也俟久之乃渡而東上坡三里抵北山之麓



循坡東行五里逾南下之嘴得一橋跨澗是為箐口於是渡澗入峽循澗南崖東向上二里過一碑即來時所見盤蛇谷碑也又東三里過一西來枯澗又二里南折而北乃逾其北突之嘴而東遂東南漸上其峽遂曲折掩蔽始不能西見高黎貢峯矣又南六里抵楊柳灣而飯乃逾南來之峽溯東來之流二里有橋跨澗西度之從澗西溯箐上又一里為打板箐有數十家當澗西又東北四里過平度之脊其脊度峽中乃自北而南即從冷水箐西度蒲縹又北過此夾蒲縹之水北出而入潞江者也是日熱甚得一蔭輒止而延憩數息樹邊不復問行之遠近矣過脊東下一里止於落馬廠時纔下

午以熱甚擔夫不前也

二十三日平明從落馬廠東行三里逾東突之山嘴而南又一里餘有一菴倚西山之上又南四里過石子哨始南下二里餘望溫泉在東山下乃從岐東南下二里餘轉而北涉北流一澗又半里東從石山之嘴得溫泉焉其水溫而不熱渾而不澄然無氣焰可浴其山自東山橫突而西為蒲縹下流之案也浴久之從澗東溯流二里餘抵蒲縹之東邨蒲人縹昌九蠻飯以擔夫不肯前逗留久之乃東二里上坡五里迤中二種遇上峰頭又平行嶺夾一里稍東下有亭橋跨峽間時風雨大至而擔夫尚後坐亭橋待久之過午始行又東南上坡逾

坡一重轉而北又逾坡一重共六里過孔雀寺又東上坡五里直躡東峰南突之頂此頂自北而南從此平墜度為峽一岡西迤乃復起為崖度為蒲縹後山北去而夾蒲縹之淵南去而盡於攀枝花者也又東一里稍上復盤一南突之嘴於是漸轉而北二里有公館踞岡頭乃北下一里而止於冷水箐時方下午以擔不能前遂止見邸榻旁有卧而呻吟者乃適往前途為劫盜所傷還卧於此被劫之處去此纔六里乃日纔過午而盜即縱橫可畏也

二十四日雨復達旦但不甚大平明而飯行隨東行之箐上其北坡三里循嘴北轉二里漸下一里下至峒即昨被劫之商過難處也其北叢山夾立穿其峽行三里再過一東突之坡其水始北下隨之北二里下至峒窪中乃東轉而上一里過峒子鋪覓火把為芭蕉洞遊計又東半里過岡頭窪地遂轉北下三里餘越一坡脊過窪中匯水之崖崖石上插而水畜崖底四面俱峻水無從出而甚渾由其南再越脊而下一里餘至芭蕉洞乃候火於洞門擔夫摘洞口黑果來啖此真覆盆子也其色紅熟則黑而可食比前去時街子所鬻黃果形同而色異其熟亦異其功用當亦不同也黃者非覆盆覆盆補腎變白為黑則為此火至燃炬入洞始向北即轉北下四丈餘至向所入昏黑處即轉北向其下已平兩崖愈狹而愈高六七丈更

寬崇一柱中懸大如覆鐘擊之聲鈸鈸然其處蓋不特此石有聲卽洞底頓足輒成應響蓋其下亦空也又入五六丈兩崖石色有垂溜成白者以火燭之以手摩之石不潤而燥紋甚細而晶土人言二月間石發潤而紋愈皎苗謂之開花洞名石花以此石花名頗佳而志稱爲芭蕉不如方言之妙也更北路盡由西腋透隙入復小如門五丈有圓石三疊如幢蓋下垂又如大芝菌而三級纍之者從其下復轉而北其中復穹然宏聳又五六丈西北路盡洞分兩岐一南上環爲曲室三丈而止一北入降爲墜道七丈而止是洞曲折而旁竇不多宛轉而底平不汙故遊者不畏深入使中有通明之處

則更令人恍然矣出至向所入昏黑北轉處今已通明見直東又一岐入有柱中間之以餘炬入探其中亦穹然六七丈而止出從洞門外以餘炬入探西崖間小竇其竇北向懸壁間其門甚隘而中亦狹而深穢氣撲人乃舍之出洞下百餘步抵坑峽下觀水洞水洞者卽此洞之下層也雖懸數丈實當一所前中入有聲已知其下之皆空矣洞前亦東向稍入亦曲而自北來與上洞同一格但水溢其中不能進也由此東折而北共里餘抵卧獅窩邨飯於邨婦家北三里過一邨卽東上堤是爲大海子隨海子南堤東行二里下堤又東一里爲沙河橋其橋五鞏名衆安橋越橋東卽從岐西北循山

行二里過胡家墳為正統間揮使胡琛墓墓有穹碑為王學士英所撰又一碑乃其子者則王翰撰時之文與吾家梧膝之壠文翰規制頗相似其頽蕪亦相似也其一時崇尚窮微薄海萬里同風至荆棘銅駝又曠代無異可慨也其墓欲迎水作東北向遂失下手砂且偏側不依九隆正脈故胡氏世賞雖僅延而當時專城之盛遂易永昌故郡也胡氏時適改為司獨專其地今復為郡設流官胡氏遂微土人言胡氏墓法宜出帝王為朝中所知因攝斷其脈余按鑿脈乃諸葛南征時所為土人誤耳更循山而北一里上一東盤之嘴於是循岡盤壠螿石引槽分九隆池之水南環坡畔以潤東塢之畦路隨槽堤而北是隆慶二年築置孔四十一以通水編號以次而及名為號塘費八百餘金遇有峽東出處則螿石

架空渡水人與水俱行橋上而橋下之峽反澗也自是竹樹扶疏菓塢聯絡又三里抵龍泉門乃城之西南隅也城外山環寺出有澄塘滙其下是為九隆池由東堤行見山城圍繞間一泓清涵空人心目池北有亭閣臨波迎嵐掬翠灑漱生輝有坐堤垂釣者得細魚如指亦有就蔭賣漿者惜有擔夫同行急於脫鷁遂同入城半里北抵法明寺仍憩會真樓而崔君亦至崔江西人寓此為染鋪前去時從磨盤石同行抵騰依依後復同歸以擔夫行遲至蒲縹先返余遲一日至故復來此看余遂與同入市換錢昇夫市魚烹於酒家與崔共酌暮返樓夜大雨

二十五日曉霽崔君來候余餐與之同入市買琥珀綠蠹又

有顧生者崔之友也導往碾玉者家欲碾翠生石印池孟子  
不遇期明晨至

二十六日崔顧同碾玉者來以翠生石界之二印池一孟子  
碾價一兩五錢蓋工作之費逾於買價矣以石重不便於行

故強就之

此石乃潘生所送者先一石自多而間有翠點而翠色鮮艷逾於常石人皆以翠少棄之問用塘抵

上司取索皆不之用余反喜其翠以白質而顯故取之潘謂此石無用又取一純翠者送余以爲妙品余反見其黷然無光也今命工以白質者爲二池以純翠者爲孟子

時囊中已無銀以麗江銀盃一隻  
重二兩餘 昇顧生易書刀三十柄餘付花工碾石是午工攜酒餚酌於北樓抵晚乃散

二十七日坐會眞樓作記

二十八日花工以解石來示

二十九日坐會眞樓上午往叩閃知愿將取前所留翰札碑

帖閃辭以明日還過潘蓮華家將入晤遇雞足安仁師

麗江公差

目把延至與邱生邱新添人眇一目以箕仙

行術前會於騰先過此

同行萬里知己

得之意外喜甚遂回過余寓坐久之余亦隨訪其寓下午乃

返

三十日晨餐後往拜潘卽造閃知愿猶不出人傳先生以腹瀉延入西亭相晤余以安仁遠來其素行不凡且齋有麗江雲邁全集來至并求收覽閃公頷之余乃出往安仁寓促其以集往而余遂出龍泉門觀九龍泉 龍泉門城之西南門

也在太保山之南麓門外卽有澗自西山北夾而出新城循之而上澗之南有山一支與太保並垂而易羅池當其東盡處週迴幾百畝東築堤漚之水從其西南隅汎池上溢有亭跨其上東流入大池大池北亦有亭池之中則鄧參將子龍所建亭也以小舟渡遊焉池之南分水循山腰南去東泄爲水竇以下潤川凡四十餘竇五里近胡墳而止焉由池西上山北岡有塔南岡則寺倚之寺後有閣甚鉅閣前南隙地有花一樹甚紅卽飛松之桐花也色與刺桐相似花狀如凌霄而小甚然花而不實土人謂之雄樹旣而入城卽登城北躡其城側倚而上一里餘過西向一門塞而不開乃轉而北

又里餘則山東突之坪也其西竇蓋山穹立甚高東下而度一脊其南北甚狹度而東鋪爲平頂卽太保之頂也舊爲寨子城胡淵拓而包此頂於內西抵度脊處而止亦設門焉塞而不開所謂永定永安二門也舊武侯祠在諸葛營今移於此頂余入而登其樓姜按君有詩碑焉坪之前有亭踞其東由此墜而下甚峻半里卽下臨玉皇閣後由其西轉閣前而入會真飯焉

六月初一日憩會真樓

初二日出東門溪之自龍泉門灌城而東者亦透城而出度弔橋遂隨之至行田塍中十里至河中邨有石橋北來之水

遂分而爲二一由橋而東南注一遶邨而西南曲越橋東一里餘則其地中窪而沮洳又里餘越岡而東一里抵東山之麓由岐東北二里過大官廟上山曲折甚峻二里餘至哀牢寺寺倚層巖下西南向其上崖勢層疊而起卽哀牢山也飯於寺由寺後沿崖上一里轉北行頂崖西半里轉東行頂崖北一里轉南行頂崖東頂崖者石屏高挿峰頭南北起兩角而中平玉泉二孔在平脊上孔如二大屨並列中隔寸許水皆滿而不溢其深尺餘所謂金井也今有樹碑其上者大書爲玉泉按玉泉在山下大官廟前亦兩孔而中出比目魚此金井則在山頂有上下之別而碑者顧溷之何也又一碑樹

北頂惡哀牢之名易爲安樂焉蓋無徵矣南一里至頂南一里東南下又一里西南下其處石崖層疊蓋西北與哀牢寺平對俱沿崖而倚者也又南下里餘爲西來大道有茅菴三間倚路旁是爲茶菴由此東向循峽而入五里過一峒峒中有廟西向東一里度中窪之岩復東過峒又從嶺上二里餘盤北突之嘴其北峽之底頗見田形於是東南下二里越一峽而東一里東上岡又里餘逾峒東南行見其東有南北峽中乾無水峽東其山亦南北亘有一二家倚之是爲清水溝溝中水不成流以從峽底東度脈者隨峽南行一里復度而東上岡始望見南壑中窪其南有峰危聳中立卽筆架山之

北峰也前從水寨西南盤嶺時所望正南有峰雙突如馬鞍者卽此峰也其峰在郡城東南三十餘里卽清水西山南下之脈至此而盡結爲此山南北橫亘西自郡城望之四頂分尖北自此臨北祇見北垂一峰如天柱從岡上東盤北峰三里降而下窪始有小水自北峽下一里涉之又東循北山一里餘過一脊峒又西稍降一里始見東山漸豁山岡向東南下中路因之又一岐東北分趨瓦渡又一岐西南下坑坑中始聞水聲有三四家倚西山崖下是爲沈家莊其下有田塍當坑底焉已暮欲投之宿遂西南下一里餘及坑底渡小水西南半里投宿邨家暮雨適來

初三日雨潺潺不止飯而登途稍霽復南下坑底半里渡坑澗復東南上坡一里餘得北來大路隨之南行岡脊三里其岡在垂塢中遂隨之下一里南行塢中其中有小水唧唧乃穿壑西南逼近筆架東北之麓合北來沈莊水同東而達於閃太史墓前者也路又南一里逾一小峒一里稍下遂沿塢東行其塢始豁而東向去水從其西南瀨筆架山之北岡亦隨之東折一里餘逾一小岡而下卽閃墓之虎砂也北望有塋當中坡之嘴乃涉壑而登之卽閃太史夫人馬氏之塚太翁所擇而窆者已十餘年矣其脈西北自昨所度沈家莊東岐之脊東南下又峙爲一巨山下墜自西而東者爲虎砂卽



來道所再逾者自東而南者爲龍砂卽莊居外倚者而穴懸其中東南向外堂卽向東之塢水流橫其前而內堂卽涉壑而登者第少促而峻瀉當橫築一堤拒兩砂間而中畜池水方成全局虎砂上有松一圓獨聳余意亦當去之其莊卽在龍砂之東坡上又隔一小塢亦有細流唧唧南注外堂卽下之水從墓又東半里逾小水抵莊莊房當邨廬之西其門南向前三楹卽停太翁之柩者鑰之未啟後爲廬居西三楹差可憩時守者他出止幼童在余待久之欲令其啟鑰入叩太翁靈几不得遂從邨東問所謂落水坑者其言或遠或近不可方物有指在東北隅者趨之逾岡脊而北二里餘得一中

窪之潭有水嵌其底四面皆高週遭大百畝而水無從出從窪上循其北而東上坡又里餘而得獼獼寨數十家分踞山頭其嶺亦從北而亘南東南接天生橋者爲閃莊東障之山余時不知其爲天生橋但求落水坑而不得惟望閃莊正東其山屏起下陷如有深穴意此中必有奇勝然已隨土人之指而逾其北矣遍叩寨中獼獼終無解語者遂從東嶺西南下仍抵窪潭之東得南趨之道乃隨之循東嶺而南二里見有峽東自屏山下陷處出峽中無水而水聲甚沸乃下見有水西自壑底反東向騰躍而不見下流所出心奇之而不能解乃先溯旱峽道北嶺東入二里抵下陷處見石崖驂列中

遊記 滇十  
夾平底半里峽分兩岐一北向入者峽壁雙駢而底甚平中  
無滴水如抉塹而入而竟無路影一南向入者東壁甚雄峽  
底稍隆起而水與路影亦俱絕路則直東躡嶺而上余意在  
窮崖不在陟岵乃先趨北向峽中底平若嵌若鴻溝之界而  
中俱茅塞一里未有窮極復轉再趨南向峽中披茅而入半  
里東崖突聳路輒緣西崖上俯瞰峽中其南忽平墜而下深  
嵌數丈東崖特聳之下有洞呀然西向而闕於坑底路亦從  
西崖陡下坑中遂伏莽而入洞洞門高數丈闕止丈餘水痕  
尙溼乃自外入洞中者時雨甫過坑源不長已涸而無流入  
洞二丈中忽闇然下墜其深不測余乃以石塊擲之久而磴

然若數十丈不止然有聲如止洞底有聲如投水中固知其  
下有水而又不盡水也出洞南眺其坑亦南夾不知窮極然  
或高或窪底亦無有平準乃從舊路北出半里復隨大路行  
峽底半里復隨北嶺小徑二里西抵聞水聲處其坡在閃墓  
正東二里逾橫峽而南有寨數家乃西通山窠南通落水寨  
總道大路自山窠走天生橋出枯柯順甯卽從此寨沿南嶺  
而入者余時尚不知所入嶺卽天生橋也惟亟西下絕壑視  
西來騰躍之水一里抵壑之懸絕處則水忽透石穴下墜其  
石皆磊落倚伏故水從西來搗空披隙而投之當亦東合天  
生橋之下者也其水卽沈家莊西北嶺岫諸水環閃墓閃莊

之前又東盤岡嘴始北曲而東入於此此所謂小落水坑也  
卽土人所謂近者余求之而不得不意過而過之時已過午  
遂南越一岡又西下一里仍南渡其水曲復西逾坡一里再  
至閃莊余令顧奴瀹水餐飯旣畢而其守者一人歸覓匙鑰  
不得乃開其外門而拜於庭始詢所爲天生橋落水洞之道  
乃知落水有二洞小者近卽先所遇者爲本塢之水大者遠  
在東南十里之外乃山窠南道所經爲合郡近城諸流又知  
天生橋非橋也卽大落水洞透穴潛行而路乃逾山陟之其  
山卽在正東二里外余隨其指先正東尋天生橋二里至橫  
峽南嶺之寨將由南嶺大路東入再執途人問之始知卽前

平底峽中東上之坡是爲天生橋逾之卽爲枯柯者余乃不  
復入將南趨落水寨一土人老而解事知余志在山水曰是  
將求落水洞非求落水寨者此洞非余不能指若至落水寨  
而後廻則迂折多矣遂引余從其寨之後東逾嶺莽蒼無路  
姑隨之行二里越嶺東下卽見一溪西南自落水寨後破石  
門東出盤曲北來至此嶺東麓卽搗入峽峽東卽屏山下陷  
之南峰與所逾之嶺夾成南北峽水從南入峽懸溜數丈滙  
爲潭東崖忽進而爲門高十餘丈闊僅數尺西向峙潭上水  
從潭中東搗而入之其勢甚沸余從西崖對瞰其入若飲之  
入喉汨汨而進而不知其中之崆峒作何狀也余從西崖又

緣崖石而北見峽中水雖東入而峽猶北通當卽旱峽南或高或窪南出之峽由此亦可北趨峽底西向旱壑洞固知兩洞南北各峙而同在一峽中第北無水入而南吸大川耳其中當無不通故前段石有水聲而上以橋名也從西崖俯瞰久之仍轉南出土老翁欲止余宿余謂日尙高遂別之遵南路可以達郡惟此處猶不得路蓋沿大溪而南抵西山峽門卽落水寨西越坡湖小溪而西上嶺盤筆架山之南卽郡中通枯柯大道余乃西從之沿坡涉塢八里抵西坡下有獾獾寨數家遂西上坡層纍而上八里其山北盤爲壑而南臨下嵌之澗有四五家倚北峽而居上復成田焉又西盤西峰南峰

而上三里其上甚峻又平行峰頭二里余以爲此筆架南峰矣而孰知猶東出之支也其西復下墜爲坑與筆架尙隔一塢乃下涉坑一里越坑西上始爲筆架南垂有數十家卽倚南崖而居是爲山窠當從投宿而路從樹底行不辨居址攀樹叢而上一里遂出邨居之後意西路可折而轉旣抵其西復無還岐竟遵大路西北馳二里餘下涉一澗復西北上坡二里餘越坡復下而涉澗共三里又上逾一坡乃西向平下二里出峽門已暮從昏黑中峻下二里西南渡一溪橋又西北從岐逾坡竟失路躑躅二里得一寨於坡間是爲小寨叻居人停行李於其側與牛圈隣出橐中少米爲粥以餐而卧

初四日其家插秧忙甚竟不爲余炊余起問知之卽空腹行以爲去城當不及三十里也及西行復逾坡兩重共八里有廬倚山西向而居始下見郡南川子又隨坡西向平行五里趨一西下小峽復上一西突之岡始逼近西川下瞰川中之水從坡西南環坡足東南抱流而入峽坡之南有堰障之此卽清水關沙河諸水合流而東南至此將入峽東向而出落水寨者也於是東北一里餘下至坡麓循嘴北轉半里始舍山而西北行平陸間二里西及大溪有巨木橋橫其上西渡之西北行川間屢過川中村落十六里而及城之東南隅度小橋由城南西向行一里而入南門始入市食饅麵而飽焉

下午返會真樓

初五初六兩日憩會真樓  
初七日閃知愿來顧謝余往叩靈几禮也知愿餽餅二色  
初八日知愿又餽猪羊肉并酒米甚腆  
初九日閃太史招遊馬園園在龍泉門外期余晨往余先從法明寺南過新建太翁祠祠尙未落成倚山東向與法明同其南卽方忠愍公祠名政征麓川死於江上者亦東向正室三楹俱守者棲止於其中兩廡祀同難者俱傾倒惟像露坐焉出祠遂南出龍泉由池東堤上抵池南卽折而西入峽半里圍臨峽西坡上與龍泉寺相並圍之北卽峽底也西自九隆山後環峽

而來有小水從峽底東出僅如線不絕而園中則陂池層匯其北一池地更高水從其底泛珠上溢其池淺而水獨澄映有光從此遂潺潺瀉外池中滿菱荷東岸舊有菜根亭乃馬玉麓所建者併園中諸榭俱頽圯太史公新得而經始之建一亭於外池南岸北向臨流隔池則龍泉寺之殿閣參差岡上浮屠倒浸波心其地較九龍池愈高而陂池晝映泉源沸漾爲更奇也蓋後峽環夾甚深其水本大及至峽口此園當之峽中之水遂不由溪而沁入地中故溪流如線而從地旁溢如此池與九龍池其滔滔不舍者卽後峽溪中之流也余至太史已招其弟知愿相待先同觀後池溢泉遂飯於

池南新亭開宴亭中竟日懽飲洗盞更酌抵暮乃散是日始聞黃石翁去年七月召對大廷與皇上面折廷諍後遂削江西郡幕項水心以受書帕亦降幕劉同升陳之遴亦以上疏降幕翰苑中正人一空東省之破傳言以正月初二其省中諸寮無不更易者雖未見的報而顏同蘭之被難可知矣

初十日馬元中劉北有相繼來拜皆不遇余往玉工家故也返樓知之隨拜馬元中并拜俞禹錫二君襟連也皆閃太翁之婿前於知愿席相會而未及拜且禹錫原籍蘇州其祖諱彥中辛丑進士

中時猶李時彥後復俞姓名彥

移居金陵大功坊後其祖父

年俱壯閃太翁寓金陵時欲移家南來遂以季女字俞前年

太翁沒命來就婚擬明春偕返云時禹錫不在遂返會真閃  
太史以召對報來示

十一日禹錫招宴候馬元中并其內叔閃孩識孩心等同飲  
約同遊卧佛

十二日禹錫饋兼金下午元中移酌會真樓拉禹錫同至雷  
風大作既暮乃別

十三日禹錫以他事不及往卧佛余遂獨行東循太保山麓  
半里出仁壽門仁壽西北倚太保山北麓城隨山西疊而上  
與龍泉同出城卽有深澗從西山懸坑而下卽太保山頂城  
後度脊所分之水也逾橋循西山直北半里有岐東北行平

川中爲紙房邨間道其循山直北者乃逾嶺而西向青蒿壩  
通乾海子者余乃由間道二里北過紙房邨又東一里餘出  
大道始爲拱北門直向卧佛寺者又北一里越一東出小澗  
其北有廟踞岡頭乃離城五里之舍也大道中川而行尙在  
板橋孔道之西又北五里再過一廟在路之西其西又有巨  
廟倚西山邨落倚之所謂紅廟邨也又北八里有一澗自西  
山東出逾之而北是爲郎義邨邨廬聯絡夾道甚長直北二  
里邨始盡緣邨西轉有水自北堰中來卽龍王塘之下流也  
溯流沿坡西北行三里有一卷門東向列路旁其北卽深澗  
緣坡下乃由卷門西入緣南坡俯北澗西入半里聞壑北水

遊記 滇十一  
聲甚沸其中深木叢箐虧蔽上下而路乃緣壑北轉不半里  
穿門北上則龍王祠巍然東向列其前與左皆盤壑蒙茸泉  
聲沸響乃由殿左投箐而下不百步而泓泉由穴中溢東向  
墜坑其北坑中又有水瀉樹根而出亦墜壑同去其下懸墜  
甚深而藤蘿密蔓余披蔓涉壑求之抵下峽則隔於上凌上  
峽則隔於下蓋叢枝懸空密蔓疊幙咫尺不能窺惟沸聲震  
耳而已已乃逾其上後棘蔓中攀西北崖而上按統志謂龍  
王巖斷崖中劈兀上萬仞余望雙巖上倚山頂謂此有路可  
達宛轉上下終不可得乃返殿前而飯仍出卷門遂北下度  
澗橋見橋北有岐緣澗西入而山頂雙巖正峙其西余遂從

之始緣澗北半里遂登坡西上直上者三里抵雙巖之下路  
乃凌北巖之東逾岫而西北去余瞰支峰東北垂意卧佛當  
在其西北峰下遂西北逾支峰下坑盤峽遵北坡東行二里  
見有路自北坡東來復西北盤岫上疑以爲此卽卧佛路當  
從山下行不登山也欲東下土人言東下皆坑崖莫可行須  
仍轉而南隨路乃下從之轉南又二里隨前東來之路下坡  
二里從坡麓得一邨邨之前卽沿麓北行之大道沿之北又  
五里稍西向入谷則卧佛寺環西谷中而谷前大路則西北  
上坡矣蓋西山一支至是東垂而出北峽爲清水關南抱爲  
卧佛巖但清水深入而卧佛前環耳入谷卽有池一圍當寺



前其大不及九隆池而迴合更繁池東有一亭綰谷口由池北沿池入池盡其西有官房三楹臨其上北楹之下泉汨汨從砌石間溢入池中池甚清淺官房之西厯砌上卽寺門也亦東向臨之其內高甍倚巖門爲三卷亦東向卷中不楹而磚亦橫鞏如橋卷外爲簷以瓦覆石連屬於洞門之上壁洞與鞏連爲一室鞏高而洞低鞏不掩洞則此中之竒也其洞高丈餘而深入者二丈橫闊三丈其上覆之石甚平西盡處北有門下嵌而入南有臺高四尺其上剜而入臺如胡床橫列而剜有石像曲肱卧臺上長三丈頭北而足南蓋此洞橫闊止三丈北一丈嵌爲內洞之門南二丈猶不足以容之自

膝以下則南穴洞壁而容其足其像乃昔自天威者自鎮守內官鞏其前軒又加斧琢而貼之金今則宛然塑像失其真矣內洞門由西北隅透壁入門凹而下其內漸高以覓炬未入時鞏殿有携酒三四生挾妓呼僧圍飲其中余姑出殿從北廡廂樓下覓睡處且買米而炊焉北廡之西亦有洞高深俱丈五尺亦卷其門而南向於正洞之北隅其中則像山神以爲夔法者是夜卧寺中月頗明奈洞中有鬻子寺中無好僧懶懶而卧

十四日早飯於僧舍覓火炬入內洞初由洞門西向直入其中高四五丈闊二丈深數丈稍分岐輒窮無甚竒也仍出從

門內南向覓旁竇而上入二丈亦窮而出笑此洞之易窮有童子語於門外曰曾入上洞乎余今蚤暗中入幾墜危竇若穿洞而上須從南不可從北也余異其言乃益覓炬再入從南向旁竇得一小穴反東向上其穴員如甑既上其穴豎而起亦員如井從井中攀南崖則高而滑不可上乃出取板櫬爲梯以升既上其口如井欄上有隙橫於井口之西復盤隙而北再透出一口則有峽東西橫峙北向出峽則淵然下墜其深不可覩卽前內洞直入之底也無級可梯故從其東透層穴而上耳南向下峽丈餘有洞仍西向入其下甚平其上高三四丈闊約丈五西入亦五六丈稍分爲岐而止如北洞

之直入者焉此洞之奇在南穿甑穴層上井口而復得直入之洞蓋一洞而分內外兩重又分上下二重又分南北二重始覺其奇甚也既出仍從池左至谷口大路余時欲東訪金雞溫泉當截大川東南向板橋姑隨大路北瞰之半里稍西北上坡見其路愈西上乃折而東隨旁岐下坡蓋西北上者爲清水關道乃通北衝者川中直北五里爲章板邨爲雲龍州道川東躡關坡而上爲天井鋪道從此遙望皆相對也下坡一里其麓有一邨從此由田塍隨小溪東南行二里始遇清水關大溪自北而南流川中隨之南行半里渡橫木平橋由溪東岸又東半里過一屯遂從田塍中小徑南行半里稍

折而西復南就一小水隨之東下遂無路莽蒼行草畦間東  
南一里半始得北來小路隨之南又得西來大路循之其東  
南一里又有溪自北而南其大與清水溪相似有大木橋架  
其上度橋東遂南行二水俱西曲而合受龍王塘之水東折  
於板橋之南焉路南行塍中又二里半而出板橋街之中山  
街稍南過一小橋卽沿小溪東上半里越溪上梗東南二里  
半漸逼東山過一邨稍南又東半里有小溪自東北流西南  
涉之從溪東岸又東南二里直逼東山下復有邨倚之從邨  
南東向入有水春踞岡上岡之南卽有澗自木鼓山北峽來  
遶岡南西去有亭橋跨其上此大道也小徑卽由北脊入峽

盤岡東下遂溯溪岸東行一里有小木橋平跨上流乃南度  
之又東上坡一里而至金雞邨其邨居廬連夾甚盛當木鼓  
山之東南麓邨東有泉二池出石穴中一溫一寒居人引溫  
者滙於街中爲池上覆以屋又有正屋三楹臨池之南庭中  
紫薇二大樹甚艷前有門若公館然乃市酒餐飯於市而後  
浴於池池四旁石甃水止而不甚流亦不甚熱不甚清尙在  
永平溫泉之下而有館有門則同也從邨後東南循峽上嶺  
數里自金雞邨逾嶺東下通大寨瓦渡之路也從邨後直東  
上木鼓西南峯二十里有新建寶頂寺余不及登遂從邨西  
南下三里北折度亭橋北隨溪西南行塍中五里西值大溪

溪之東有邨傍之乃稍溯之北度大木橋而西行腔中又四里而至見龍里其南有報功祠甚巨西向而祠樓則南面入其中祠空而樓亦空樓上止文昌一座當其中寺僧云昔有王靖遠諸公神位覓之不見也由此又十里入拱北門又二里而返會真令人往訊安仁已西往騰越矣

十五日憩會真樓

十六日往晤閑知愿還拜劉北有留飯即同往太保山麓書館館中花木叢深頗覺幽閒坐久之雨過適閃知愿送南園錄并永昌志至即留館中北有留余遷寓其內余屢辭之至是見其幽雅即許之約以明晨雨止劉以鑰匙付余以劉將

赴秋闈不暇再至也余乃別還會真

十七日閃知愿再候宴并候其兄太史及其族叔孩識同宴

深夜乃別

十八日遷館於山麓西南打索街即劉北有書館也其館外有賃居者以日用器進亦劉命也余獨坐館中為抄南園漫錄既而馬元中又覓續錄至余因先抄續錄乘雨折庭中花

上花插木毬腰孔間輒活蕊亦吐花

花上花者葉與枝偕吾地木樞而花正紅似閩

中扶桑但扶桑六七朶並攢為一花此花則一朶四瓣從心中又抽出疊其上殷紅而開久自春至秋猶開雖揮地輒活如榴然然植庭左則又以杜鵑魚子蘭蘭如真珠蘭而無蔓活右則槁亦甚奇也細黃子叢其上如魚子不開而落幽韻同蘭小山茶分植其孔無不活者既午俞

禹錫雨中來看且攜餐蕢酒贈余詩有下喬之句謂會真樓高爽可盡

收一川陰晴也余答以幽棲解嘲五律謂便於抄書也

十九日抄書書館閃知愿以竹紙湖筆餽以此地無紙筆俱不堪書也

二十日抄書麓館

二十一日孩識來顧

二十二日抄書麓館

二十三日晨大雨稍霽還拜孩識并謝劉北有下午赴孩識之招閃俞俱同宴深夜乃別

二十四日糧絕知劉北有將赴省闈欲設酌招余余乃作書

謂百杯之招不若一斗之粟可以飽數日也

二十五日新添邱術士挾一劉姓者至邱自謂諸生而以請仙行招遊九

龍池遂泛池中亭子候劉攜酌不至余返寓抄書北鄰花紅

正熟枝壓墻南紅艷可愛摘而食之以當井李此間花紅結子甚繁生青

熟紅不似余鄉之熟輒黃也余鄉無紅色者花紅之名俱從此地也下午北有以牛肉斗米餽

劉閃馬俱教門不食豬而食牛劉以素餠四品餽

二十六至二十九日俱抄書麓館俱有雨時止時作無一日晴也

裔孫 熙海南校字

遊記第九冊上終

遊記第九冊下

江陰徐宏祖霞客著

一里子其水瀾寄介立輯

同邑

季夢良會明編

其大後學李其灝銀瀾

重校

楊名時凝齋閱

族孫徐鎮筠峪

滇遊日記十一

己卯七月初一至初三日抄書麓館亦無竟日之晴先是俞禹錫有僕還鄉請為余帶家報余念浮沉之身恐家人已認為無定河邊物若書至家中知身猶在又恐身反不在也乃作書辭之至是晚間不眠仍作一書擬明日寄之

初四日送所寄家書至俞館而俞往南城吳氏園余將返其

童子導余同往過南關而西一里從南城北入其園有池有橋有亭在池中主人年甚少昆仲二人一見即留酌亭中薄暮與禹錫同別始知二主人即吳麟徵之子新從四川父任歸者麟徵以鄉薦初任教毘陵陞南部故與俞遇今任四川建昌道矣

初五日又絕糧余作書寄潘蓮華復省中吳方生潘父子以初八日赴

公車且與潘索糧不及待往拜吳氏昆仲不遇即乘驛出龍泉門為乾海子之遊由九隆池左循北坡西向上一里出寺後

南瞰峽中馬家園即前日因太史宴余其中者昔為馬業今售閔氏矣從此益西向上一里瞰其北峽乃太保新城所環其上者乃知其西即寶蓋山之頂今循其南岡而上也又迤

邐上者三里始隨南峽盤坡入二里路北之樹木森鬱而上路南之樹木又森鬱而下各有莊舍於其中其北者為薛莊其南者為馬莊其樹皆梨柿諸果余夙聞馬元中有兄居此元中囑余往遊且云家兄已相候久矣至是問主人已歸城莊虛無人時日甫上午遂從其後趨乾海子道其處峰稍南曲其下峽中在深澗自西北環夾東出水聲驟沸即馬家園縮九隆南塢之上流也此處騰湧澗中外至塢口遂伏流不見南溢而下汎者為馬園內池北溢而下汎者為九隆泉池皆此水之伏而再出者也於是循澗北崖盤坡而上一里北折入峽二里稍下就澗行其處東西崖石夾峙水騰躍其中

路隨之而上蓋已披寶蓋山之西麓矣或涉水西或涉水東或涉水中而上北五里漸西其溪分兩道來由其中躡嶺西北上始望見由此而北分峽東下者爲寶蓋之脊又東下而爲太保由此而南分峽東下者爲九隆南山之脊又東下爲九隆岡此其中垂之短支躡之迤邐上五里始西越其脊下瞰脊西有峽下遶甚深水流其中沸甚此卽沙河之上流也其西又有山一重橫夾之乃爲南下牛角關之脊而此脊猶東向之旁支也循北崖西行三里餘始西南墜壑下下又三里餘始抵溪之東岸兩崖夾溪之石甚突兀溪流逗石底而下層疊騰湧而蒙箐籠罩之如玉龍踴躍於青絲步障中志

所謂溜鐘灘豈卽此耶路緣東崖下北溯溪有小洞倚崖西瞰溪流入坐其間水乳滴瀝如貫珠下出復北溯溪三里有木橋跨而西度其西上嶺遂與沙河上流別三里登南度之脊其脊中低南北皆高南卽牛角關之脈北高處爲虎坡乃從西北度脈而來者路逆溯之循北嶺東坡而上又二里從嶺北西向穿峒是爲虎坡此坡由北冲東蒲蠻塞嶺度脊西南下遶爲北冲南峰南向逶迤東墜沙河之源西環乾海之塢南過此嶺稍伏而南聳牛角關又伏而度脈分支西北掉尾者爲蒲縹西嶺正文東峙松子山遶石甸東而南盡於姚關者也過幽西卽有坑西墜路循北坡西北行五里西下行



峽中溯流躡淵三里再逾嶺又三里出嶺西始見西南下壑稍開有西峽自北而南與南峽合而西去有茅墩龕嵌峽底曰鑼鼓寨皆獼猴之居於是盤東坡北向而轉溯西峽之上行蓋西峽有山自北峒分支南亘環於東界之西路由其中直披北峒而入三里涉北來小水遂西盤其峒脊二里出峒西其西南盤壑復下開而路乃北向躡嶺曲折西北盤之而升三里餘登嶺頭蓋此嶺從虎城北乾海子東分支西突又西度爲大寨西峰南北橫亘於大寨瑪瑙山之間此其東下之嶺也其北爲崇脊其南爲層壑遙望數十家倚西亘橫峯下卽大寨也於是西南盤層壑之上二里越岡西下又二里西南

下至塢間涉北來小峽又西上半里是爲大寨所居皆茅但不架欄亦獼猴之種俗皆勤苦懸山五鼓輒起昏黑乃歸所懇皆磽瘠之地僅種燕麥蒿麥而已無稻田也余初買米裝貯爲入山之具而顧僕竟不之携至是寨中俱不稻食煮大麥爲飯強嚙之而卧

初六日天色陰沉飯麥由大寨後西涉一小峽卽西上坡半里循西山北向而升二里坡東之峽駢東如門門以內水猶南流而坡峽俱平遂行峽中又北一里有岐逾西山之脊是爲瑪瑙坡道余時欲窮乾海子從峽中直北行徑漸翳水漸縮一里峽中纍纍爲環珠小阜卽度脈而爲南亘西山此其

平脊也半里過北卽有坑北下由坑東循大山西北行又一里而見西壑下嵌中圓如圍城而底甚平卽乾海子矣路從東山西向環海子之北一里乃趁峽下東山卽虎坡大脊之脈有岐東向逾脊爲新開青江壩道入郡爲近南下半里抵海子之北卽有泉一圓在北麓間水淙淙由此成流出其東西麓間俱有茅倚坡臨海而居而西坡爲盛又半里循麓而入西麓之茅其廬俱橫重木於前出入皆逾之其人皆不解漢語見人輒去廬側小溪之成流者南流海子中海子大可千畝中皆蕪草青青下乃草土浮結而成者亦有溪流貫其間第不可耕藝以其土不貯水行者以足撼之數丈內俱動

牛馬之就水草者祇可在涯涘間當其中央久駐輒陷不能起故居廬亦俱瀕其四圍祇懸坡布變而竟無就水爲稻畦者其東南有峽乃兩山環湊而成水從此洩路亦從此達瑪瑙山然不能徑海中央而渡必由西南沿坡灣而去於是倚西崖南行一里餘有澄池一圓在西崖下蕪海中其大徑丈餘而圓如鏡澄瑩甚深亦謂之龍潭在平蕪中而獨不爲蕪翳又何也又南一里過西南隅茅舍其廬亦多有路西北逾山云通後山去不知何所其南轉脇間有水從石崖下出流爲小溪東注余初狎之欲從蕪間涉此水近水而蕪土交陷四旁搖動遂復迂陟西灣盤石崖之上乃倚南山東向行一

里餘有岐自東峽上南逾山脊為新開道由此而出爛泥壩者余乃隨坡而下東峽半里則峽中橫木為橋其下水淙淙北自海子菰蒲中流出破峽南墜峽甚逼仄故一木航之此水口之最為滌結者其水南下即為瑪瑙山後來中瀑布矣度橫木東復上坡半里陟其東岡由脊上東南行還顧海子之窩嵌其西北出峽之水墜其西南其下東南塢中平墜甚深中夾為箐叢木重翳而轟崖倒峽之聲不絕其前則東西兩界山又伸臂交舒關峽南去海子峽橋之水屢懸崖瀉箐中南下西轉而出羅明壩焉於是循東山瞰西峽東南行一里餘轉而南下一里有路逾東嶺來即大寨西來者隨之西南下坡半里忽一

廬踞坡西向而居其廬雖茅蓋而簷高牖爽植木環之不似大寨海子諸茅舍姑入而問其地則瑪瑙山也一主人冠衣而出揖而肅客則馬元康也余夙知有瑪瑙山以為杖履所經亦可一寓目而不知為馬氏之居馬元中曾為余言其兄之待余余以為即九隆後之馬家莊而不知有瑪瑙山之舍瑪瑙山一統志言瑪瑙出哀牢支隴余以為在東山後乃知出東山後者為土瑪瑙惟出此山者由石穴中鑿石得之其山皆馬氏之業元康一見即諦視曰即徐先生耶問何以知之曰吾弟言之余望之久矣蓋元中應試省中先以書囑元康者乃瑪瑙山而非九隆後之馬家莊也元康即為投轄割雞為黍見其二子深山杳藹之中疑無人跡而有此知己如遇仙矣

下午從廬西下坡峽中一里轉北下臨峽流上多危崖藤樹  
倒罨鑿岸迸石則瑪瑙嵌其中焉其色有白有紅皆不甚大  
僅如拳此其蔓也隨之深入間得結瓜之處大如升圓如毬  
中懸為宕而不粘於石宕中有水養之其精瑩堅緻異於常  
蔓此瑪瑙之上品不可猝遇其常積而市於人者皆鑿蔓所  
得也其拳大而堅者價每筋二錢更碎而次者每筋一錢而已是山從海子峽口橋東南  
環而下此其西掉而北向處即大寨西山之西坡也峽口下  
流懸級為三瀑布皆在深箐廵崖間雖相距咫尺但聞其聲  
而樹石擁蔽不能見其形況可至其處耶坐瑪瑙崖洞間有  
覆若堂皇有深若曲房其上皆垂幹虬枝倒交橫絡但有氤

氳之氣已無斧鑿之痕不知其出自人工者元康命鑿崖工

人停搥向垂箐覓樹蛾一筐

乃菌之生於木上者其色黃白較木耳則有莖有枝較雞蓂則

非土而木以是為異物而已

且謂余曰箐中三瀑以最北者為勝為崖崩

路絕俱不得行當令僕人停鑿芟道異日乃可梯崖下瞰也

因復上坡至其廬前乃指點四山審其形勢元康淪茗命醴

備極山家清供視隔宵麥飯糲口不謂之仙不可也

初七日雨與元康為楸中之樂棋子出雲南以永昌者為上

而久未見敵手元康為此中巨擘能以雙先讓余遂對壘者

竟日

初八日晨飯欲別而雨復至主人復投轄佈杆下午雨霽同

其次君從廬右瞰溪懸樹下一里得古洞乃舊鑿瑪瑙而深入者高四五尺闊三尺以巨木爲橋圍支架於下若橋梁之鞏間尺餘輒支架之其入甚深有木朽而石壓者上透爲明洞余不入而下仍懸樹一里墜澗底其奔湧之勢甚急而掛瀑處俱在其上下峽中各不得達仍攀枝上所攀之枝皆結異形怪果苔衣霧鬚蒙茸於上仍二里還廬舍元康更命其僕執爰前驅令次君督率之從向來路上二里抵峽口橋東岡墜崖斬箐鑿級而下一里餘憑空及底則峽中之水倒側下墜兩崖緊束之其勢甚壯黔中白水之傾瀉無此之深騰陽滴水之懸注無此之巨勢既高遠峽復逼仄盪激怒狂非

復常性散爲碎沫倒噴滿壑雖在數十丈之上猶霏霏珠捲霰集滇中之瀑當以此爲第一惜懸之九天蔽之九淵千百年莫之一睹余非元康之力雖過此無從寓目也返元康廬挑燈夜酌復爲余言此中幽勝其前峽下五里有峽底橋過之隨峽南出有水簾洞溯峽北入卽三瀑之下層而水簾尤奇但路闕難覓明晨須同往探之此近勝也渡上江而西有石城挿天倚雪山之東人跡莫到中夜聞鼓樂聲土人謂之鬼城此遠勝也上江之東瑪瑙之北山環谷迸中有懸崖峰巒倒拔石洞崕呀是曰松坡爲其家莊其叔玉麓構閣青蓮在石之阿其人云亡而季叔太麓今繼棲遲一日當聯騎而

往此中道之勝也余聞之既喜此中之多奇又喜元康之能  
悉其奇而余之得聞此奇也地主山靈一時濟美中夜喜而  
不寐

初九日余晨起欲爲上江之遊元康有二騎一往前山未歸  
欲俟明日同行余謂遊不必騎亦不必同惟指示之功勝於  
追逐余之欲行者正恐其同其不欲同者正慮其騎也元康  
固留余曰俟返塗過此當再爲一日停乃飯而下山元康命  
其幼子爲水簾洞導於是西下者五里及峽底始與峽口橋  
下下流遇蓋厯三瀑而北迂四窠崖之下曲而至此乃平流  
也有橋跨其上度橋西北盤右嶺爲嘴爲爛泥壩道從橋左

登左坡之半其上平行有水一塘滙岡頭數十家倚南山而  
居是爲新安哨與右嶺盤坡之道隔峽相對也水簾洞在橋  
西南峽底倚右嶺之麓幽闕深阻絕無人行初隨流覓之傍  
右嶺西南行荒棘中三里不可得其水漸且出峽當前峭尖  
山之隩矣乃復轉迴環遍索得之絕壁下其去峽底橋不一  
里也但無路影深阻莫辨耳其崖南向前臨溪流削壁層纍  
而上高數丈其上洞門陰呀重覆疊綴雖不甚深而中皆旁  
通側透若飛甍複閣簷牖相仍有水散流於外垂簷而下自  
崖下望之若溜之分懸自洞中觀之若簾之外幕水簾之名  
最爲宛肖洞石皆櫺柱綢繆纓幡垂颺雖淺而得玲瓏之致

但旁無側路可上必由垂簷疊覆之級冒溜衝波以施扳躋頗爲不便若從其側架梯連棧穿腋入洞以睇簾之外垂祗中觀其飛灑而不外受其淋漓勝更十倍也崖間有懸幹虬枝爲水所淋漓者其外皆結膚爲石蓋石膏日久凝胎而成卽片葉絲柯皆隨形逐影如雪之凝如冰之裹小大成象中邊不欹此又疑雪裹水不能若是之勻且省者余於左腋洞外得一垂柯其大拱把其長丈餘其中樹幹已腐而石膚之結於外者厚可五分中空如巨竹之筒而無節擊之聲甚清越余不能全曳斷其三尺攜之下并取枝葉之綢繆凝結者藏其中蓋葉薄枝細易於損傷而筒厚可借以相護攜之甚

便也水簾之西又有一旱巖其深亦止丈餘而穹覆危崖之下結體垂象紛若贅旒細若刻絲攢水鏤玉千萼並頭萬蕊簇穎有大僅如掌而笋乳糾纏不下千百者真刻楮雕棘之所不能及余心異之欲擊取而無由適馬郎攜斧至借而擊之以衣下承得數枝取其不損者二枝并石樹之筒託馬郎攜歸瑪瑙山俟余還取之遂仍出橋右與馬郎別乃循右坡西上里餘隔溪瞰新安哨而行大雨忽來少憩樹下又西里餘盤石坡之嘴轉而北行蓋右坡自四窠崖頡頏西來至此下墜而崖石遂出有若芙蓉簇萼空中有若綉屏疊錦崖畔不一其態北盤三里又隨灣西轉一里餘又北盤其嘴於是

向北下峽中蓋四窠橫亘之峰至此西墜爲壑其餘支又北轉而突於外路下而披其隙也二里餘塢底有峽自東北來遂同盤爲窪而西北出路乃挾西坡之麓隨之西轉其中沮洳踣陷深澁豈爛泥壩之名以此耶西北出隘一里循東坡平行西瞰墜壑下環中有邨廬一所是爲爛泥壩邨路從其後分爲二岐一西向下塢循邨而西北者爲上江道一北向盤坡轉而東北登坳者爲松坡道余取道松坡又直北一里挾東城北嘴盤之東行半里遂東北披峽而上躡峻半里其上峽遂平溯之東入一里峽西轉半里越西峽而西北上其坡高穹陡削一里餘盤其東突之崖又里餘逾其北亘之脊

由脊東北向隨坡一里路又分岐爲二一直北隨脊平行者橫松枝阻絕以斷人行一轉東入腋者余姑隨之一里其坡東垂爲脊稍降而東屬崇峰此峰高展衆山之上自北而南東截天半若屏之獨插而起者其上松羅叢密異於他山豈卽松坡之主峰耶脊間路復兩分一逾脊北去一隨脊東抵崇峰乃傍之南下二里徑漸小而翳余初隨南下者半里見壑下盤遶崇峰南垂而東不知其壑從何出知非松坡道乃仍還至脊北向行東截崇峰西塢二里塢北墜峽西下路從崇峰之西北崖行盤其灣越突坡三里餘西北下峽中其下甚峻而路荒徑窄疑非通道下二里有三四人倚北坡而樵



呼訊之始知去松坡不遠乃西轉而就峽平行里餘出峽口  
其西壑稍開崇岡散爲環阜遂有參差離立之勢又西下里  
餘有邨廬當小窩而居邨中巨廬楊氏在北馬氏在南乃南  
趨之一翁方巾藜杖出迎爲馬太麓元康長郎先已經此爲  
言及翁訝元康不同來余爲道前意翁方淪茗而山雨大至  
俟其霽下午乃東躡坡上青蓮閣閣不大在石崖之下玉麓  
先生所棲真處太麓於是日初招一僧止其中余甫至太麓  
卽攜酒授餐隨不及覽崖間諸勝太麓年高有道氣二子長  
讀書郡城元次遂侍山中元亮爲余言其處多巖洞亦有可深  
入者二三處但路未開闢當披荆入之地當山之翠微深崖

墜壑尙在其下不覺其爲幽閼亂峰小岫初環於上不覺其  
爲孤高蓋崇山西北之支分爲雙臂中環此窩南夾爲門水  
從中出而高黎貢山又外障之真棲遯勝地買山而隱無過  
於此惟峽中無田米從麓上尙數里也松坡雖太麓所居而  
馬元中之莊亦在焉  
初十日晨起霽色可挹遂由閣東竹塢遶石崖之左登其上  
其崖高五六丈大四丈一石擎空四面壁立而南突爲巖其  
下嵌入崖頂平展如臺岡脊從北來環其後斷而復起其斷  
處亦環爲峽遶崖左右而流泉澌之種竹峽中嵐翠掩映道  
從之登昔玉麓構殿三楹在頂塑佛未竟止有空梁落燕泥  
也已復下青蓮閣從閣側南透崖下其巖忽縹雲罨幙亭亭

遊記 滇十一  
上覆而下臨復登然無地轉其西巖亦如之第引水環流其  
前而斷北通之隘致下巖與上臺分爲兩截余謂不若通北  
隘斷東路使青蓮閣中道由前巖之下從西北轉達於後峽  
仍自後峽上崖臺庶漸入佳境不分兩岐也既而太麓翁策  
杖攜晨餐至餐畢余以天色漸霽急於爲石城遊大麓留探  
松坡石洞余以歸途期之太麓曰今日抵江邊已晚不必渡  
可覓土官早龍江家投宿彼自龍登山指南不然其地皆燹  
寨無可通語者余識之遂行乃西南下至其廬側遂渡塢中  
南出之水共西一里上循西坡北向行一里轉而披其西峽  
半里逾脊西下一里下至壑中其處忽盤窩夾谷自東北而

透西南之門路循其南坡西行一里涉峽中小水同透門出  
乃西南隨坡下三里復盤坡西轉望見南塢中開下始有田  
有路從東南來合卽爛泥壩北來道也坡西南麓有數家倚  
坡南向是爲某某仍下坡一里從卽左度小橋是坡左右俱  
有小水從北峽來而卽懸其中又西北開一峽其水較大亦  
東來合之會同南去當亦與松坡水同出羅明者由是望其  
西北而趨一里逾坡入之又渡一東北來小水卽循北坡溯  
澗西北行二里西下渡塢中澗復西北上澗西之山又隨其  
支峽入二里再上盤西突之坡坡西有壑中盤由壑之北崖  
半里環陟其西脊約三里由脊西南下半里平行枯峽中一

里有枯峽自北來合橫陟之循北嶺之坡西行一里其處峽分四岐余來者自東又一峽自北又一峽自南雖皆中枯皆水所從來者又一峽向西則諸流所由下注之口路當從西峽北坡上行余見北來峽底有路入遂湖之二里其中復環爲一壑聞水聲淙淙數家倚西坡而居是爲打郎入詢居人始知上江路在外峽之西壑東北亦有路逾嶺此亦通府之道獨西北乃山之環脊無通途也乃隨西山之半南向出二里盤西山之南嘴而西其前有路自峽底來合則東來正道也於是倚北崖西行西峽之上峽南盤壑屢開而水仍西注峽北西垂漸下石骨迸出行二里時上午暑甚余擇蔭卧石

半晌乃西北下坡半里有澗自東來其水淙淙成流越之仍倚北坡西北行二里飯於坡間又西北二里越岡西下其間坑塹旁午陂陀間錯木樹森羅二里路岐爲兩一西南一西北余未知所從從西北者已而後一人至曰西南爲猛賴渡江徑道此西北道乃曲而從猛淋者余欲轉其人曰旣來一里不必轉卽從猛淋往可也乃西北隨峽稍下二里餘有聚落倚南坡臨北壑是爲猛淋此乃打郎西山南下西轉掉尾而北環爲此壑其壑北向頗豁遙望有巨山在北橫亘西下此北冲後山夾溪西行而盡於猛賴溪北王尙書寨嶺者也壑中水當北下北冲西溪其人指余從猛淋邨後西南逾嶺

遊記 滇十一  
行一里陟嶺頭逾而南下遂失路下一里其路自西來合遂  
稍東下度一小橋乃轉西南越坡二里則坡南大澗自東而  
西向注有路亦自澗北西來其路則沿坡而上余所由路則  
墜崖而下於是合而西向半里沿溪半線路行其崖峭石凌  
空下臨絕壑其下奔流破峽倒影無地而路緣其間嵌壁而  
行西南半里稍下離崖足迴眺北崖上插猶如層城疊障也  
又西二里餘從崖足盤西南突嘴半里始見上江南塢其峽  
大開中嵌爲平疇祇見峽底而不見江流有溪自西山東南  
橫界平疇中直抵東山之麓而余所循之溪亦西南注之峽  
口波光四圍蕩漾其處不審卽峽溪所匯抑上江之曲余又

疑東南橫界之流卽爲上江然其勢甚小不足以當之方疑  
而未定逾突嘴而西又半里轉而北隨北峽下一里從北峽  
西轉始見上江北塢雖平疇較小於南塢而北來江流盤折  
其中東峽又有溪西向入之其南流雖大而江流循東山之  
麓爲東山窟蔽惟當峽口僅露一斑不若此之全體俱現也  
又西向者一里有十餘家倚南山北向而居其前卽東峽所  
出溪西南環之間上江渡何在邨人指在其西北問旱土官  
何在在其西南二里乃北渡其溪溪水頗大而其上無橋僅  
橫一木平於水面兩接而渡之而木爲水激撼搖不定而水  
時踴躍其上雖跣足而涉而足下不能自主危甚於是上西

坡南向隨流行陸間一里稍折而西南又一里入早氏之廬已暮始在其外室甚陋既乃延入中堂主人始出揖猶以紅布纏首者訊余所從來余以馬氏對曰元康與我厚何不一束相示余出元康詩示之其人乃去纏首易巾服而出再揖遂具晚餐而卧其中堂此地為猛賴乃上江東岸之中其脈由北冲西溪北界之山西突為王尚書營者下墜塢中為平疇南衍至此上江之流西灤之北冲西溪東夾之而當其交會之中溪南即所下之嶺自猛淋南夾溪南下時為下流之龍砂而王尚書營嶺即其本支而又為上流之虎砂也上江之東尚稱為寨一十八寨皆土會官舍江以西是為十五喧喧者取喧聚之

義謂眾之所集也惟此地有此稱其人皆桑欄居窟處與粵西桑地相似而早龍江乃居中而轄之者

十一日晨起早龍江具飯且言江外土人質野不馴見人輒避君欲遊石城其山在西北崇峽之上路由蠻邊入蠻邊亦余所轄當奉一檄令其火頭供應除道撥寨夫引至其處不然一時無棲托之所也余謝之龍江復引余出廬前曠處指點而言曰東北一峰特聳西臨江左者為王尚書駐營之峰西北重峽之下一岡東突江右者是為蠻邊昔麓川叛酋思任踞為巢其後重崖上是為石城思曾恃以為險與王尚書夾江相拒者也此地昔為戰場為賊窟今藉天子威靈民安

地靜物產豐盈盛於他所他處方苦旱而此地之雨不絕他處甫插蒔而此中之新穀已登他處多盜賊而此中夜不閉戶敢謂窮邊非樂土乎第無高人至止而今得之豈非山川之幸余謝不敢當時新穀新花一時並出而晚稻香風盈川被隴真邊境之休風而或指以爲瘴亦此地之常耳既飯龍江欲待行余固辭之期返途再晤乃以其檄往出門卽溯江東岸北行二里時渡舟在西岸余坐東涯樹下待之半晌東來乃受之溯流稍北又受駝騎此自北冲西來者渡舟爲龍江之弟龍川所管祇駝騎各異之錢而罄身之渡無異錢者時龍川居江岸西與蠻邊之路隔一東下小溪渡夫謂余自

蠻邊回必向溪南一晤龍川余許之乃從小溪北岸登涯卽

西北行於是涉上江之西矣此十五喧之中也循西山北二

日爲崩戛南二目爲入灣崩戛北爲紅毛野人入灣南爲潞江安撫司昔時造橋

西逾山心出壺瓶口至騰陽道尙在其南下流二十里其天生石崖可就爲橋址者又在其下

昔衆議就崖建橋孫郡尊已同馬元中輩親至而相

度之後徐別駕及騰越督造衛官以私意建橋於石崖北沙

嘴之冲旋爲水摧去橋竟不成此江王靖遠與思任夾江

對壘相持不得渡王多命縛筏一夕縛羊於鼓縛炬於筏放

之蔽江南下思酋見之以爲筏且由下流渡競從西岸趨下

流而王師從上流濟矣遂克之今東岸之羅明乃其縛松明寨羅鼓乃其造鼓寨也西北三里有溪自

西峽出北渡之半里有聚落倚坡東向羅列是爲蠻邊按志十五

喧無蠻邊之名想卽所謂中覓火頭不見其妻持檄覓一僧

岡也閃太史亦有莊在焉

讀之延余坐竹欄上而具餐焉其僧卽石城下層中臺寺僧  
結菴中臺之上各喧土人俱信服之今爲取木延匠將開建  
大寺此僧甫下山與各喧火頭議開建之事言菴中無人勸  
余姑停此候其明日歸方可由菴覓石城也余從之坐欄上  
作紀下午浴於澗復登欄觀火頭家烹小豚祭先令一人從  
外望一人從內呼問可來曰來了如是者數十次以布曳路  
間度入龕而酌之飯之勸亦如生人薄暮其子以酒肉來獻  
乃火酒也酌於欄上風雨忽來雖欄無所蔽而川中蘊熱卽  
就欄而卧不暇移就其室也

火頭者一喧之主也卽  
中土保長里長之類

十二日火頭具飯延一舊土官同餐其人九十七歲矣以年

高後改於早龍江者喧中人皆言其人質直而不害人爲土  
官最久曾不作一風波有饋之者千錢之外輒不受當道屢  
物色之終莫得其過跡喧人感念之共宰一牛賣爲贍老之  
資旣飯以一人引余往中臺寺余欲其人竟引探石城不必  
由中臺其人言喧中人俱不識石城路惟中臺僧能識之且  
路必由中臺往無他道也余不信復還遍徵之喧中其言合  
遂與同向中臺由邨北溯溪西向入二里過上蠻邊漸入峽  
又西一里餘涉一水溝遂臨南澗倚北坡而行又里餘則北  
坡稍開有岐北去又西逾坡過一水塘北下峽中共二里有  
溪自北峽來架木爲橋西度之橋之南又有溪自南峽西來

與橋水合進而出於蠻邊南大溪者既度橋西卽北向上坡其坡峻甚且湍甚陷淖不能舉足因其中林木深闊牛畜踐踐遂成淖土攀陟甚難二里就小徑行叢木中三里復與大路合峻與湍愈甚又北上一里折而西南上峽中一里南逾其岡則中臺東下之脊也始見有茅菴當西崖之下其崖轟然壁立於後上參霄漢其上蓋卽石城云乃入菴菴東向乃覆茅爲之者其前積木甚巨一匠工斲之爲殿材昨所晤老僧號滄海四川人已先至卽爲余具飯余告以欲登石城僧曰俟必明日今已無及矣此路惟僧能導之卽喧中人亦不能知也余始信喧人之言不謬遂停其茅中此寺雖稱中臺實登山

第一坪也石城之頂橫峙於後者爲第二層其後又環一峽又轟而上卽雪山大脊之東突是爲第三重自第一坪而上皆危嶂深木蒙翳懸阻會無人跡惟此老僧昔嘗同一徒持斧秉炬探歷四五日於上二層各斫木數十株相基卜址欲結茅於上以去人境太遠乃還棲下層今喧人歸依漸有展拓矣

十三日僧滄海具飯卽執爿前驅余與顧僕亦曳杖從之從坪岡右腋仆樹土度而入其樹長二十餘丈大合抱橫架崖壁下其兩旁皆叢箐斜藤不可着足其下坎礫蒙蔽無路可通過樹沿西崖石腳南向披叢棘頭不戴天足不踐地如甃遊伏莽狻過斷枝惟隨老僧僧攀亦攀



遊記 滇十一  
僧掛亦掛僧匍匐亦匍匐二里過崇崖之下又南越一岡又  
東南下涉一筭共里餘乃南上坡踐積茅而橫陟之其茅倒  
者厚尺餘豎者高丈餘亦仰不辨天俯不辨地又里餘出南  
岡之上此岡下臨南峽東向垂支而下有微徑自南峽之底  
西向循岡而上於是始得路隨之上躡其上甚峻蓋石城屏  
立此其東南之跌南峽又環其外惟一線懸崖峽之間遂從  
攀躋西向上者五里乃折而北上一里西北陟坎礪之石半  
里抵石城南垂之足乃知此山非環轉之城其山則從其後  
雪山之脊東度南折中兜一峽南嵌而下至此南垂之足乃  
峽中之門也其崖則從南折之脊橫列一屏特聳而上至此

南垂之足則承跌之座也峽則圍三缺一屏則界一爲二皆  
不可謂之城然峽之杳渺障於內屏之突兀臨於外此南垂  
屏峽之交正如黃河華嶽湊扼潼關不可不謂險之極也從  
南垂足盤其東麓而北爲崖前壁正臨臺菴之上壁間有洞  
亦東向嵌高深間登之縹緲雲端憑臨瓊閣所少者石髓無  
停穴耳盤其西麓而北爲崖後壁正環墜峽之東削壘上壓  
淵塹下蟠萬木森空藤蘚交擁幽峭之甚循崖北行一里路  
分爲二一東北上爲躡崖頂者一西北爲盤峽幽者乃先從  
峽半里涉其底底亦甚平森木皆浮空結翠絲日不容下墜  
山上多扶留藤所謂簍子也此處尤巨而長有長六  
丈者又有一樹徑尺細芽如毛密綴皮外無毫隙 當其中

有木龍焉乃一巨樹也其下體形扁縱三尺橫尺五自地而上高二尺五寸即半摧半茂摧者在西北止存下節茂者在東南聳幹而起其幹正圓圍如下體之半而高不啻十餘丈其所存下節並附之其圓亦如聳幹得下體之半而其中皆空外膚之圍抱而附於聳幹者其厚止寸餘中環腹如桶而水盈焉桶中之水深二尺餘蓋下將及於地而上低於外膚之邊者一寸有五其水不甚清想即樹之瀝也中有蚪蚪躍跳杓水而乾之則不見然底無旁穴不旋踵而水仍滿亦不見所自來及滿至膚邊下寸五輒止不溢若有所限之者此又何耶

其樹一名溪母樹又名水冬瓜言其多水也土人言有心氣痛者至此飲之輒愈老僧前以砍木相基至

亦即此水為餐而食 樹之北有平岡自西而東屬於石崖之峰即度岡

之北有窪滙水為馬鹿潭言馬鹿所棲飲者窪之北則兩崖對束如門潭水所從泄也循岡西上半里西大山之麓有坡一力巨木交枕雲日披空即老僧昔來所砍而欲卜之為基者寄宿之茅尚在其側由此西上可登上臺而路愈蔽乃返由前岐東北躡崖半里而凌其上南瞰下臺之龕菴如井底寸人豆馬蠕蠕下動此菴遂成一畫幅其頂正如堵墻南北雖遙而闊皆丈餘上下雖懸而址皆直立由其上東瞰上江如一線而東界極北之曹澗極南之牛角關可一睫而盡惟西界之南北為本支所掩不能盡崩戛入灣之境也西眺雪

遊記 滇十一  
山大谷可以平揖而問第深峽中嵌不能竟陟耳乃以老僧  
飯踞崖脊而餐之仍由舊徑下趨中臺菴未至而雨爲密樹  
所翳不覺也既至而大雨僧復具飯下午雨止遂別僧下山  
宿於蠻邊火頭家以燒魚供火酒而卧

十四日從蠻邊飯而行仍從舊路東南一里宜東下悞循大  
路倚西山南行二里望渡處已在東北乃轉一里得東下之  
路遂涉坑從田陞東行一里至早龍川家卽龍江之弟分居  
於此以主此渡者時渡舟尙在江東岸龍川迎坐以待之其  
妻女卽織紕於旁出火酒糟生肉以供余但飲酒而已不能  
啖生也雨忽作忽止上午舟乃西過又候舟人飯當午乃發

雨大作同渡者言猛賴東溪水暴漲橫木沉水底不能着足  
徒涉之水且及胸過之甚難余初以路資空乏擬仍宿早龍  
江家一日而至松坡二日而至瑪瑙山皆可無煩杖頭卽取  
所寄水簾石樹歸今聞此知溪旣難涉且由溪北岸溯流而  
入由北冲逾嶺旣免徒涉之險更得分流之脊於道里雖稍  
遠况今日尙可達歪瓦則兩日卽抵郡其行反速也遂從渡  
口東向截塢望峽入先由塢東行田塍間一里路爲草擁草  
爲雨偃幾無從覓幸一同渡者見余從此亦來同行令之前  
驅半里遂及峽口循峽北突峰南麓東向入溪沸於下甚洶  
湧五里峽自北來有邨在東山下曰猛岡路挾西山北轉上

遊記 滇十一  
坡五里遂東盤東峰之南椒又東十里有峽自東南來想門  
猛湫所從來之小徑也於是折而北上山岫二里聞犬聲又  
里餘山環谷合中得一坪四五家倚之南向而居曰歪瓦遂  
止而宿

十五日平明飯而行雨中南陟東坡一里稍北下三里餘不  
得路乃西向攀茅躡坡二里登嶺乃得南來之路又稍北循  
崖曲復東向行八里有峽自東來而大溪則自北峽來受其  
廻曲處藤木罨蔽惟見水勢騰躍於下路仍北轉溯之遂從  
深箐中行又二里稍下漸與溪逼又北五里峽復轉東路乃  
東溯之屢降而與溪會一路皆從溪右深箐仄崖間東北溯

流行十五里有一溪自北峽出而下有田緣之漸出箐矣又

東五里其下田遂連畦夾溪又東五里又有水自西北峽來  
溪源遂敞爲兩有橋度其北來者仍溯其東來者其下田愈

闕路始無箐木之翳又東五里北界之山中環爲坪而土官

居之

亦早姓爲  
龍江之姪

南界之峽平拓爲田而村落遠之此卽所謂

北冲也又東五里山箐復合是爲箐口時纔下午而前無宿  
店遂止是夕爲中元去歲在石屏其俗猶知祭先而此則寂  
然矣

十六日由箐口東稍下入峽二里有澗自東北來越之其大  
溪則自峽中東來猶在路之南路從兩澗中支東上已復北

遊記 卷十一  
倚中支南臨大溪且上且平七里稍下又一里下及溪瀕溪  
溯水而行又里餘有木橋跨溪遂度其南岸倚南崖東向行  
又里餘復度橋行溪北岸由是兩崖夾澗澗之上屢有橋左  
右跨或度橋南或度橋北俱濼澗倚坡且上且折又連度六  
橋共七里水分兩派來一東南一東北俱成懸流橋不復能  
施遂從中坡躡峻盤垂磴而上曲折八里岡脊稍平有廬三  
楹橫於岡上曰茶菴土人又呼爲蒲蠻寨而實無寨也有一  
道流淪茗於中余知前路無居廬乃出飯就之而啖又北上  
始臨北坑後臨南坑始披峽涉水後躡磴盤脊十里乃東登  
嶺岫既至嶺頭雨勢滂沱隨流南下若騎玉龍而攬滄海者

南下三里雨忽中止雲霾遙滌又二里遂隨西峽下墜峽穿  
箐路既蒙茸雨復連綿又五里從箐底踏波隨流出又南五  
里稍東逾一東障西突之坡從其南墜坡直下者三里復隨  
峽倚東障之支南向行其西中壑稍開流漸成溪二里雨益  
大沾體塗足足滑不能定土嶮涉流隨起隨仆如是者三四  
里頭目既傷四肢受病一時無可如何雨少止又東南五里  
塢稍東曲乃截塢而度一橋橋下水雖洶湧渾濁其勢猶未  
大僅橫木而度至是從溪西隨西山行溪逼東障山去復逾  
坡墜箐向東南下五里又東南盤一坡下涉一箐又五里轉  
坡南腋間得卧佛寺已暮急入其厨索火炙衣炊湯啖所存

攜飯深夜而卧其北樓

十七日晨起絕糧計此地去郡不過三十餘里與前東自小寨歸相似遂空腹行仍再上巖殿再下池軒一憑眺之東南里許過一小室始有二家當路是爲稅司又南八里過龍王塘峽皆倚西山行又東南五里過郎義邨邨西有路逾嶺爲清江壩打郎道又南二十里至郡城北通華門外卽隨城北澗西上二里入仁壽門山新城街一里餘過法明寺前西抵劉館余初擬至乾海子一宿卽還至是又十三日矣館前老嫗以潘蓮華所留折儀并會真陶道所饋點畀余且謂閃知愿使人以書儀數次來候蓋知愿往先塋恐余東返卽留使

相待也下午安仁來俞禹錫同閃來抵暮乃別

十八日余卧未起馬元真同其從兄來候余訝其蚤曰卽在北鄰而久不知昨暮禹錫言始知之且知與老父約而不從松坡返能不使老父盼望耶余始知爲太麓乃郎太麓雖言其長子讀書城中而不知卽與劉館並也禹錫邀飯出其岳閃太翁降乩語相示錄之暮乃返閃知愿使以知愿書儀并所留柬札來且爲余作書與楊雲州

十九日閃太史手書候叙旣午乃赴之留欸西書舍小亭間出董太史一卷一冊相示書畫皆佳又出大理蒼石屏置座間另覓鮮雞羹瀹湯以佐飯深夜乃歸館知安仁所候閃序

已得安仁將反命麗江矣

二十日作書并翠生杯托安仁師齋送麗江木公

二十一日命顧僕往瑪瑙山取石樹且以失約謝馬元康

二十二日禹錫同閃□□來寓坐竟日貰酒移餽爲聯句之飲

二十三日早馬元真邀飯以顧奴往瑪瑙山禹錫知余無人具餐故令元真邀余也先是自清水關遇雨受寒受跌且受饑連日體甚不安欲以汗發之方赴市取藥而禹錫知余僕未歸再來邀余乃置藥而赴之遂痛飲入夜元真輩先去余竟卧禹錫齋禹錫攜襪被連榻且以新綿被覆余被褥俱麗

甚余以醉後覺蒸蒸有汗意引被蒙面汗出如雨明日遂霍然信乎挾纊之勝於藥石也

二十四日還寓深夜而顧奴返以馬元康見余不返親往松坡詢踪跡故留待三日而後歸也

二十五日閃太史以所作長歌贈更餽以贖其歌甚暢而字畫遒勁有法真可與石齋贈余七言歌並鐫爲合璧已而俞禹錫又使人來邀移寓余乃令顧僕以石樹往賅之相與抵掌爲興已而往謝太史之賜太史亦爲索觀遂從禹錫處送往觀之

二十六日禹錫晨至寓邀余移往其齋余感其意從之比至

而知愿歸卽同往晤且與之別知此後以服闋事與太史俱有哭泣之哀不復見客也比出門太史復令人詢靜聞名號寺名蓋爲靜聞作銘已完將欲書以畀余也更謂余石樹甚竒恐致遠不便欲留之齋頭以挹清風余謂此石得天祿石渠之供甚幸但余石交不固何知愿曰此正所謂石交也遂置石而別余仍還劉館作紀竟日晚還宿於俞旣卧太史以靜聞銘來賜謂明日五鼓祭先不敢與外事也

二十七日余再還劉館後所未盡移者并以銀五錢畀禹錫買雞蓼六觔溼甚禹錫爲再蒸之縫袋以貯焉乃爲余定往順甯夫

二十八日夫至欲行禹錫固留乃坐禹錫齋頭閱還魂記竟日而盡晚酌遂醉夜大雨

二十九日晨雨時作時止待飯待夫久之乃別禹錫適馬元真閃□□亦來送遂出南門從大道南二里至夾路邨居之街遂分路由東岐當平塢中南行西與沙河之道相望五里過神濟橋其南居廬連亘是爲諸葛營諸葛之祠在焉東向頗小又南爲東岳廟頗巨亦東向又南五里爲大樹墩亦多居廬邨之北有小溪東南流邨之南有小溪東北流合於邨之東而東去此兩流卽卧獅窩之水也又南三里有水自西沿南坡而東此乃幽子鋪東注之水小石橋跨其上越橋南



上坡路分爲三一西南向大山之麓一東南爲石甸姚關之道一直東爲養邑道於是直東行坡上三里有小溪自南而北此亦自西南而來至此北注而入於東溪同東向落水坑者其源當出於冷水等於是下越一木橋復東上坡坡北有邨倚之其地爲三條溝由坡東東南下而復上三里越一岡有兩三家當岡頭是爲胡家坡越岡而東三里又下有水自南而北南塢稍開下盤爲田有數家倚南岡是爲阿今過阿今復東上三里其南塢水遂分東西下又東五里乃飯又三里稍下爲養邑南有塢盤而爲田北正對筆架山之南垂有數家當塢日纔下午而前無止處遂宿

二十日平明起而飯出店東南行稍下渡南來小溪聞上坡東逾南轉卽養邑東環之支也有公館當坡西瞰壑中田廬歷歷東逾坡而下又涉一小塢而東上坡遂行岡頭共五里路分二岐一東南者爲西邑道一西北者爲山河壩道先是問道多言由西邑逾芭蕉嶺達亦登有熱水從石盤中溢出其處有大道通順甯余欲從之而養邑店主言往西邑路近而山溪無橋今雨後無橋水漲難渡當折而北由山河壩渡其下流仍由枯柯而達亦登爲使至是見同行者俱不走西邑而走山河壩余亦從之遂西北兩涉小塢二里餘升坡而東遂循永昌溪南岸行溪嵌崖底止見北崖削壁下嵌而猶

遊記 卷十一  
三十一  
不見水又東二里稍下見水嵌崖底如一綫遂東見其門對東如削門外環疇盤錯溪流曲折其中有邨倚北崖之東卽落水寨也其南崖之夾溪爲川者東突如踞獅水從其北出路從其南下半里遂由獅腋下降路甚逼仄半里抵獅麓又東半里一溪自南塢來有壩堰其上流有橋跨其下流渡橋東行田塍間濫甚一里登塢東岡南行一里見塢西有瀑掛西崖歷兩層而下注塢中南來之溪路隔對之東向人峽雨大至二里逾嶺頭有路西南來合山頭坑窪旁錯亂水交流又東三里再度坑峒盤而東北行其下有坑破石搜崖亦突而北注隨之一里餘乃東下越其流又東北上半里見東塢

又有小水自東而西向與南來之溪合於北崖下北崖純石聳起其上樹木葱鬱而下則有穴伏而暗墜二水之所從入也又東向上嶺半里逾其脊行嶺頭半里始見東壑有田下盤其東復有山夾之路從嶺上轉而南行一里餘而下半里其塢自南而北水亦經之度橋溯流而南二里南塢稍開是爲五馬其西南壑中居廬頗多東坡上亦有四五家居路左坡南有一坑自東峽出有小水從其中注西南壑下坑涉其水之南湖之東上里餘隨峽南轉而坑中水遂窮有脊自東而西度脊南復墜坑而下從脊東行轉坑東之崖其下亦嵌而成壑壑中亦有人家隱於深崖重菁之間但聞雞鳴春

響而已東坑既盡從其上涉塢升岡見岡南一峰特聳而卓立白霧偏籠其半乃東來脊上石峰之層起者出其北穿峒而東共二里而抵峒中之脊有巨石當脊而中踞其高及丈大亦如之其上有孔大及尺深亦如之中貯水及其半不涸不盈正與哀牢金井之孔相似踞大石而飲土人即名此嶺爲大石頭從石東下塢中道分爲二一由東向逾岡者爲大道稍迂而達大獵彝一由東南下峽者爲捷道稍近而抵小獵彝此皆枯柯屬寨也乃由峽中下於是石崖南突叢箐交縈北嵌爲峽南聳爲崖二里行南岡之上又二里盤岡嘴而南其東峽中平墜南遶蓋由此嘴東墜其下皆削崖故路又

分爲二一由崖下循崖根南轉一由崖上躡崖端南曲乃從崖端南逾石隙而下一里仍隨南坡東轉遷瞰所逾之崖壁立下嵌其下盤爲深塢崖根有泉淙淙出穴間小路之下盤者因之遙望北崖山岡排闥東出大道之東陟者因之余平行南岡又東一里下盤之小路逾岡來合又東一里餘南岡復東突路下其北腋間復盤峒東上半里登東岡之南坡始東見枯柯之川與東山相夾而未見其西底又西南見嶺頭一峰兀突插雲霧中如大士之披絡而坐者閃爍出沒亭亭獨上乃南來脊上之峰不知其爲何名也又東一里復轉岡之北坡東下一里有四五家倚岡而居是爲小獵彝余欲下

遊記 滇十一  
坡間亦登道士人行人皆言下坡至江橋不可止宿亦無居  
停之家循江而南至亦登且五六十里時已不及而途無可  
宿必止於是時纔過午遂偕止而止幸主人楊姓者知江流  
之源委道路之曲折詢之無不實且知溢盤溫泉不在亦登  
而在雞飛乃止而作紀抵暮而卧

永昌志畧 附

漢永昌郡元爲大理金齒等處宣撫司總管置司治於永昌  
後改爲宣慰使司都元帥府洪武十五年平雲南前永昌萬  
戶阿鳳率其衆詣指揮王貞降附仍置永昌府立金齒衛十  
六年六月麗川叛屠其城二十三年省府改金齒衛爲金齒

軍民指揮使司

從指揮使  
胡淵請也

於是遂名金齒不名永昌而實非

金齒之地如瀾滄江在永昌而瀾滄衛在北勝各不相蒙蓋

國初立衛經理皆出武臣故多名實悖戾耳景泰中設鎮守

弘治二年設金騰道嘉靖元年巡撫何孟春

郴州籍  
江陰人

巡按御

史陳察

常熟  
人

疏革鎮守設永昌府立保山縣改金齒指揮使

司爲永昌衛府領州一

騰越縣二  
保山永平

仍統潞江安撫司鳳溪

施甸二長官司

保山編戶十里又城北民曰喧共十五城

南民曰寨共二十八

洪武三十三年改騰衝守禦千戶所

隸金齒司正統十四年陞爲騰衝軍民指揮使司與金齒並

嘉靖二年復置州隸永昌府改指揮使司爲騰衝衛州名騰

越在府城南三百六十里 永平即東漢之博南縣 以山洪

武初隸永昌府三十二年改府為金齒指揮司屬指揮司管

轄嘉靖二年復府仍屬府 在府東一百七十里 潞江安撫司在城西

南一百三十里 元柔遠路國初柔遠府 永樂九年立安撫司 鳳溪長官司在城

東二十五里 施甸長官司在城南一百里 唐銀生府北境 元為石甸後訛

為施甸

近騰諸彝說畧附

騰越密邇諸彝實滇西藩屏而滇境大勢北近吐蕃南皆彝

緬郡邑所置介於其間不過以聲教羈縻而已正統以來經

畧南彝者設宣慰司六禦彝府二宣撫司三州四安撫司一

長官司二如孟養阻負於西最為荒僻而緬甸八百老撾地

勢瀕海木邦車里猛密又在其內業非羈縻所可制馭而近

聽約束者惟南甸干崖隴川而已數十年頻遭緬患如刁落

參以南甸近彝奪刁落寧之官尙構緬內訌為兵備胡公心

忠所殲岳鳳父子以隴川舍目謀主多思順之地造逆犯順

為叅將劉縉所擒邊境賴以安其後阿瓦日強蠶食日多幸

撫彝同知漆文昌知州余懋學請大司馬陳公用賓檄暹羅

以弱緬而騰獲稍康迨思正就戮瓦酋猖獗命思華據迤西

思禮據木邦思綿據蠻莫而內地漸為逆緬所竊至若多俺

席麓川之舊附緬而叛天朝叅將胡顯忠平之多安民藉安

酋瓦酋之援負固以拒天兵兵備黃公文炳參將重獻策取  
之騰之獲存者幸也目今瓦酋獯悍稱雄諸彝悉聽號召倘  
經略失馭其造亂者尤有甚於昔也為騰計者慎之外芒市  
雖屬府近以猛穩為木那轄藏賊劫掠騰境不安所恃簡廷  
臣防禦之而反罹其害自後當重其責以弭變庶於騰少安  
云

裔孫 熙海南校字

遊記第九冊下

終

